

萬 有 文 庫

第二集七百七種

王 雲 五 主 編

明 詩 紀 事

(九十二)

陳 田 輯

商 務 印 書 館 發 行

舊

萬有文庫

第二集七百種



商務印書館發行

明 陳田 輯
詩 書
二 用
紀 用
使 用
公 用
書 館

明 事 紀 用 詩 書



空軍軍醫本學圖書館

登錄號 111


類 號 08312
111

I. D. O. C. A. F. C. S. LIB.

1125

~~#870.727 | 7560~~

#811.1046 / 7560



明詩紀事卷二十四

辛籤

萬時華十三首

時華字茂先，南昌人。崇禎中徵士，有溉園、東湖二集。

黎遂球蓮鬢閣集。茂先五言古出入陶謝。七言律澹婉清麗，如溫飛卿、李商隱。

西江詩話：崇禎末，詔舉堪守令者，茂先應徵北上，抵邗江，病劇。粵東黎美周、廣陵鄭超宗、舉舟徑造，茂先喜甚，猶賦詩云：病逢助倍藥，快聚夜頻觴。臨沒口占二截，半世殘書裏，關門坐小樓。虞卿是何物，不了著書愁。窮通真偶爾，來去亦翛然。我愛裴中令，虛空不礙禪。從容危坐而卒。茂先詩尤工五言，其氣深厚，其姿淡逸。

徐世溥榆溪逸稿：詩人萬茂先，其言精美溫潤，體備氣醇。

田按：茂先田居詩，陳士業、舒伯言亟稱之。集中七律清婉瀏亮，尤爲獨絕。

歲暮田居有引 錄四

負疴中田歲律云暮，時謝賓遊以親妙藥，旁視四壁，忽忽意動，吟咏遂生，積五日得二十首，詩不云乎：獨寐寤言，余之謂矣。

幽居念疇昔，日月忽已今。無論悲與歡，事事勞寸心。宇宙一泡幻，謗譽隨升沈。誰識道旁牧，慨慷揮黃金。

復思隆中叟。三十逢知音。高臥北堂上。羞同梁父吟。

獨處行易悲。我反甘茲獨。出門語嘿乖。聊此慎榮辱。歷覽貧士傳。幸同古賢躅。薄暮何所懷。凌風倚修竹。陶公有清怨。含意獨不歡。枕席晤千載。耳目皆悲端。衆但慕高節。此意終不傳。古壁照燈影。破爐生暮寒。孤憤託尙友。撫几流長嘆。

張薦隱深竹。仲蔚樂長蒿。風塵昧至性。幽翳良自逃。宅東有高畝。負甕聊周遭。左渠帶長川。蒼然山氣遙。卜築暫云始。綺季徐可招。榆柳前後列。蔬蔓縱橫交。長揖謂園叟。開春護新條。小人學爲圃。飛鳥營其巢。

夕佳樓

朝登北城風怒號。沙飛十丈寒雲高。春鴻欲歸呼其曹。樓頭歌管聲嘈嘈。此地管絃朝復夕。父老經過多太息。城中少年那復知。云是當年僕公室。僕公生長自邊塵。百花洲畔吟餘春。秋風五桂散遙馥。兄弟出入皆朱輪。潮陽歸來遍紅巾。翰林樹幟城東門。堞摧櫓折鼓聲死。清池湛湛哀英魂。從者妻子十一人。葬者道士陳白雲。東風花開鎖空宅。狐啼鼠竄無朝昏。僕家之樓夕佳額。滄桑轉眼悲行陌。凭闌風物誰獨存。章流靜照西山色。城邊擊鼓白日低。明月光中烏夜啼。游人醉舞公獨悲。霜天客散颺朱旗。一朝幸遇李夫子。爲汝拂拭揚鬢眉。樓頭歌舞如昔時。樓下木主公安之。南州一片中華土。節義晶晶亘今古。後來孫許氣如虹。日月河山共吞吐。中原寇馬今復馳。江南江北多鼓聲。公排帝闈叫閭闔。爲我擊賊綏蒸黎。

西江志。僕家樓。元末僕列篋闔門死難。有司徒其樓於西北城角。以旌忠烈。萬歷間。更名夕佳樓。

春日張玄逸竹雪齋同朱鬱儀張曼胥胡實美戴大圓李雲將各賦

七子林中約。依然竹下盟。疏煙宜弱柳。輕雨澀春鶯。大業千秋社。偏師五字城。杜陵花事好。今日慰平生。
清涼臺懷古

高臺同一望。人照夕陽多。豐鎬餘亭榭。陳隋舊綺羅。美人曾玉樹。衰草失銅駝。怪得當時鳥。城邊喚奈何。
過素園理雲將遺集悽然有作

千遍題詩百舉觴。昔時風雨共閒房。藤陰尙覆攤書屋。樹影空搖看竹床。憶數春花紅在樹。或眠秋篔碧
爲廊。相如狼藉多餘草。寂寞文園泣武皇。

下第送芑孫之蕪江兼訊崑銅諸子

淚盡蘋花不自由。與君同恨別孤舟。貧多去國家難問。賤欲嫌身客未休。月照離魂生古岸。霜催寒信入
輕裘。尤憐脫劍逢知己。江南江北處處愁。

與黎美周徐巨源飲喻京孟瑤光昆仲三洲亭夜汎舟于湖有作

共選晴湖泛綠莎。三洲亭向午餘過。詩情入韻多因柳。酒氣分香半雜荷。島嶼斜連疑海近。樓臺深隱覺
山多。知君近訪林逋宅。疏影梅魂近若何。
美周來自西湖

吏隱亭

橋水東西孺子鄰。當年仕隱各全身。龍蛇今古孤亭晚。桃李晴陰萬井春。大漢冰霜留氣韻。重湖煙月照精神。因君敢慢今時尉。簿領趨馳或有人。

孺子祠

舊宅曾聞傍水濱。祠堂古岸照嶙峋。五陵樹已迷狐兔。一榻香猶薦藻蘋。意氣何人傾赤社。英雄滿地兆黃巾。當年龍戰終多事。千古冥鴻屬外臣。

述懷

芙蓉萬樹照晨梳。短髮蕭蕭愧不如。老圃東家堪作伴。苧衫蓬鬢帶花鋤。

觀別

芙蓉無態颭寒波。只爲空江別怨多。欲識滿汀離別意。亂煙絲雨奈卿何。

馬猶龍八首

猶龍字季房。廬陵人。有洛如館集。

蕭士瑋。蕭齋日記。馬季房語余云。近人之詩。蕪音最多。切響甚少。何也。余謂律細格老。與年俱進。皮毛脫落。乃見其實。虜畜良馬。初不令其跳躑。每夜必繫其銜勒。不容親水草。旬餘。浮腫盡消。筋力怒張。日馳數百里。不倦饑渴。不能爲之困。作詩而多蕪。

音累氣皆由淨臘未盡耳。

書影蕭伯玉云。馬季房詩。黃茆白霧三千嶂。瘦馬單衫十八盤。秣陵舊院。繡幕鶯花三月雨。畫梁燕語六朝春。故自佳。

愚山集。季房嘗夢誌公。啖以乾松。香氣猶在口。遂棄制科業。一意談無生。然任達飲酒輒醉臥。閒遊金陵。吳越及嶺海。皆以詩

自娛。清新可誦。

西江詩話。季房洛如館集。宣城施愚山捐俸錢板。毘陵楊太史大鯤詩云。廬陵詩人馬季房。花片遊絲落腕長。又云。君看洛館

存遺草。待得西湖使者傳。愚山時爲湖西憲副也。

田按。季房詩。清音亮節。如豪竹哀絲。聽之令人意爽。

雪夜宿甯國寺

雪深林際寺。蕭瑟動寒松。言尋上方侶。頗諧塵外蹤。暝痕銷霧薄。履跡破苔封。野園鳥雀亂。行人曠未逢。
忘言永今夕。僧起叩寒鐘。

過青原清幽谷

山重水複谷名愚。一筇一屐吾與俱。過溪二十四道殊。一一坐石聽笙竽。碧篠黃花生石膚。青青寒蔓水中蒲。深潭皎潔明髭鬚。沁入心脾照骨癯。且復與君立須臾。摩挲雜樹辨根株。丹林秋燒引崎嶇。空山沙迹走腐鱗。清幽僧舍隱如菰。雲竇寒泉瀉入廚。芋魁瑩滑如玉腴。山薑野菌當園蔬。青山白雲道不孤。世人欲覓無其途。誰爲後來繼我乎。林深蘿合鳥相呼。

信州水巖艤舟登飛雲閣

似是桃源道。頻通漁父船。蓮花披石秀。雲錦照川妍。江中有蓮花雲錦石壁合空遺蛻。丹封不記年。瓊田鶴駕杳。故物爲誰傳。

過寶龍寺

幽蘭香一室。老柏翠當門。春信經年隔。燈花昨夜繁。清池開白曉。新月帶黃昏。猶有營巢燕。銜泥認舊痕。

蘆林菴贈石照師

蘆林雖一宿。已作數年期。泉莫鼓三疊。峯猶憶九奇。茶香通活火。菊老映疏籬。欲析無疑義。支公別有思。

武功山二首

知坐茅菴翠幾層。冷猿遙挂一枝藤。白雲峯頂千秋月。夜夜寒光照定僧。獨有空林出梵音。愛山不覺住山深。閒來欲問齊雲路。落葉蕭蕭不可尋。

安成石屋觀周日培新構草堂

松堂人靜晚煙稠。樹古雲龍小洞幽。獨倚曲闌看翠滴。不知山色在高樓。

徐世溥十三首

世溥字巨源。新建人。侍郎良彥子。崇禎時諸生。有檢溪詩鈔二卷。逸詩二卷。

方以智浮山集。巨源天姿過人。出以易直。下筆馳驟。秦漢唐宋。惟取其氣。任我舒卷。

西陂類稿。余到南州三載。求徐巨源文翰甚渴。自陳伯璣所刻榆溪集外。卽片紙不可得。今春聞羅飯牛誦巨源贈詩云。雲山已是無常主。更寫雲山賣與誰。又云。記得扁舟初過訪。草堂門外水齊天。令人諷嘆不已。

田按。巨源文學昌黎。有酷肖者。詩丰神戾削。有疏竹幽花之致。身遭亂離。憔悴哀吟。中有不堪卒讀者。晚歲遇盜而死。哀哉。

初夏苦雨毛浚明潛夫置酒寓樓

羣峯如主人。日對樓中客。客寓復幾時。又見荒草碧。嗟峨好髻鬟。倚天蒼翠滴。當其雲雷蒸。纓帶迷咫尺。豈不愛奇觀。孤懷難達夕。我心如青山。欲雨便頭白。一觴可晤言。所以資酒德。

丹陵觀

余寓齊源。寓東不數百步。爲丹陵觀址。村巫家其西偏。觀有田及山。並南唐齊王李景遠所施。齊源之爲齊。以此也。朝代漸更。林莊漫滅。齊王像亦移入旁小庵矣。惜其無文采賓客。故編史靡得而詳。作丹陵觀詩。用表源之所由名焉。

觀廢巫仍宅。黃冠似肯堂。谷雲虛象袞。澗水尙如簧。比屋通雞犬。單籬狎虎狼。淮南有鴻烈。應不忘南唐。

初夏

不復論時節。閒中候自明。棟花風送袷。瓜蔓水通耕。輦草成趺坐。微泥得緩行。綠陰如夢裏。喚醒有啼鶯。

人日送陳元水之金陵

正是東風七日天。草堂薄醉又經年。雪分浦色初知岸。晴破江寒未散煙。鐵騎頻關孤驛夢。金陵好寄遠遊篇。蒼茫詩思斜陽裏。無限離愁付短弦。

萬里長所居

溪上芙蓉照板扉。澄流激瀨濺荷衣。鷓鴣得食排沙睡。翡翠銜魚掠水飛。樵唱不知人在谷。漁歌真令客忘歸。山中明媚看如此。忍令波光趁落暉。

過舒子山山莊賦別

爲愛騷人靜可羣。檐暉涵碧漾苔紋。遙同側帽吟移影。近佐支鐙煮沸雲。山鬼聽琴篔簹際。伏林猿擲果夜深聞。奇峯香竊平分取。留得秋光讓與君。

山莊寄懷石莊博菴

老得山居足自由。晴窗飯罷未梳頭。燕窺簾捲銜泥返。書被風掀帶葉收。小倦課奴尋藥種。乘酣信步似春游。惟嫌離索違同調。每一花開憶獻酬。

三月三日同謝聖虞訪拙公并爲公定菴名

久淹冰雪閉游幽。直到花時禮燕龕。春草屐憑康樂引。暮雲心向惠休參。難逢上巳重三會。新得嘉名百一菴。歸路催詩煙柳潤。仙壇斜雨共氤氳。

春詞

不飲已如醉。濛濛況日斜。遠鐘殘夢後。酒氣似梅花。

辛未春中逢晏山人彈陽關操

一別麻源酒幾傾。支離已見二毛生。十年風雨陽關曲。今日重聞第四聲。

書桃源圖

落英芳草閉桑麻。客到驚聞世代賒。津路早知紅樹引。秦人應梅種桃花。

初秋江上聞笛有懷同社諸子

似在天涯似比隣。若為縹緲訴情親。西風一夜江湖白。處處蘋花惱殺人。

看晚穫值守齋上人經過卻寄香城諸師

又逢秋熟客愁增。為羨高空萬念冰。三十九峯霜月滿。閉門便是六朝僧。

余正垣一首

正垣字小星。南昌人。副使曰德孫。貢生授主簿。有昔邪園集。

田按。徐巨源作南州四子傳。四子者。劉斯陸士雲。李奇平叔。鄧履中左之。余正垣小星也。四子皆能詩。余遍搜遺集。僅得小星。平叔詩。二子無傳焉。附見名字於此。

國家圖書館



004759985

豔曲

花氣和香煖。風絲伴帶長。凭欄呼小婢。莫去繡鴛鴦。

王猷定十首

猷定字于一。南昌人。貢生。有四照堂集。

韓程愈集。于一身長八尺。貌魁梧。意氣豁如。議論風發。談天下事。如觀手中菴摩羅果。纖細舉似。不失毛髮。爲文。猖狂恣睢。隨筆所如。無不深合理道。天資善書。臨池之技。可以籠鵝。客揚十餘載。所交客滿寰區。而梁公述。史蓮菴。最其所善。時或飲酒。涕泗并下。其亦所感者深也。

靜志居詩話。于一以詩。古文詞自負。對客斷斷講論。每舉一事。輒原其本末。聽之。盡心。蓋兼有筆札喉舌之妙者。其行書楷法。亦自通神。

王暉今世說。于一遭亂居廣陵。窮愁著書。力追大雅。海內能文之士。翕然推之。客死西湖。篇帙散失。大梁周司農刻其遺稿行世。

田按。于一詩。騷情古意。跌宕蕭寥。五律一體。尤哀咽動人。

螺川早發

月落秋山曉。城頭鼓角停。長江流剩夢。孤棹撥殘星。露溼鷗衣白。天光雁字青。蒼茫回首望。海岳一孤亭。

泊舟揚子橋

韎韐風濤外。閒心寄沆寥。馬嘶黃葉岸。人急暮江潮。塔影眠寒水。谿聲走斷橋。夢中敲古缶。長憶廣陵簫。

反揚州喜晤孫無言

卻訝秋還在。蕭條滿目非。江山千騎暗。城郭一人歸。見子南冠淚。猶驚楚客衣。庭花何爛漫。寂寞伴伊威。

阜城

莫問祖龍轡。嵇琴亦不聞。智愚千載事。今古一谿雲。寒鴉啼荒井。梟狐嘯野墳。往來多涕淚。幾誦蕪城文。

誕日口號

母逝悲今日。吾衰憶昔年。眼昏雙淚後。髮白五更前。狐嶺橫兵甲。龍塘買墓田。夢回先訓在。嗚咽蓼莪篇。

登燕子磯

來問草堂寺。初鐘已度橋。人煙屯石港。漁火上江潮。野戍重關靜。王畿設險遙。憑高天萬里。僧影共蕭蕭。

贈某上人

僧來方臥病。老去復逢春。煮藥妨茶竈。挑燈問海濱。琉璃能悟性。翡翠不謀身。剗卻詩名好。還娛白髮人。

贈王雪樵先生

黃流厭聽莫聽冰。古路隄河細似繩。愁過客邊新蜡臘。淚多家傍舊園陵。夔州以後論工部。凝碧歸來識右丞。誰說渡江東晉事。太原風概自稜稜。

聽柳敬亭說史

英雄頭肯向人低。長把山河當滑稽。一曲景陽岡上事。門前流水夕陽西。

青來爲公狄畫鵲令圖口占絕句

一鳥哀鳴訴九州。斷雲落日動荒邱。知君能寫飛鳴意。難寫無聲地下愁。

李奇一首

奇字平叔。新建諸生。

榆溪逸稿。劉士雲有所遊。平叔爲詩送之。不得罵人句。乃作送士雲遊蜀詩。一時傳誦。以爲李賀復生。士雲非遊蜀也。乃故誤。其題以就其佳句耳。平叔爲文。非面如土色不止。卒以瘵死。

夕佳樓晚眺

平楚蒼蒼歸雁驚。葳蕤芳草傍寒生。天隨野色低春岸。雨帶江帆隱暮城。石壁遙將孤影落。遠山微透數峯明。卻開蘿徑遲明月。渺望煙波祇一泓。

舒忠讜一首

忠讜字魯直。進賢人。修撰芬孫。崇禎庚午舉人。

劉綖墓

石馬陰嘶霜葉飛。靈風陣陣捲斜暉。傷心馬革無歸日。萬里招魂葬蟒衣。

湯開先二首

開先字季雲臨川人知縣顯祖子有潭庵集

江西詩話季雲喜爲詩少慕徐文長後嗜鍾譚常因作十燈題舉友夏照殘身益幻看定妄難生之句以爲妙絕季雲詩傳平叔序而傳之稱其哀國篇雄深慷慨似法少陵惜亡其稿而又以乙酉後流離隱約變徵之聲皆不復可得爲惜云

百花塔

塔在百花中花紅塔亦紅欄杆鶯報午鈴鐸鳥呼風野火將燒佛天香欲滿空至今洲上草金碧映芳叢

登青雲峯

選勝無如此地登頓令暑思冷於冰閒雲來去常如客亂石縱橫不礙僧寥廓入秋聲每應孤高得我氣相凌祠前古木斯人在任爾頽闌一曲凭

陳畫一首

畫字惟易金谿人諸生有雜言

江西詩徵惟易讀書躬行尤達於易爲艾千子所稱

山泉歌

左泉右泉照山影入山出山聽泉音遠山縹青近山碧大泉鐘鼓細泉琴泉上衣雲天女侍山下冷風仙

明詩紀事 辛籤 卷二十四

梵吟無生鄉在山泉裏。欲問蓮池深更深。



三一九六

明詩紀事卷二十五

辛籤

于奕正五首

奕正初名繼魯字司直宛平諸生有樸草。

詩觀司直詩清真澹雅迴絕塵俗。

靜志居詩話司直好古嘗集天下金石志雖未詳核亦足繼東陽王象之書其詩南學於楚然燕趙之風骨尙存。

田按司直與劉侗著帝京景物略遊白門將續著南京景物略書未成而卒崇禎丙子元日讀史得陸士衡傳卒年四十三以爲亡讖已而果然年亦四十三也詩學竟陵清韻鏗然蓋彼法之錚錚者。

從戒壇至凌碧峯下

一峯聳奇秀數里引人行石碎不受履下步聲鏗鏗路幽境屢換蒼翠難定名深洞限秋陽峭壁挂飛甍寂不聞衆響萬壑自成聲巖下坐老衲古澹含山情歸去失前徑處處暮雲生

雨宿潭柘

山空不易眠忽聽千峯雨洶湧欲崩屋與山相吞吐百千萬億聲奇詭不可數深慮阻遊屐起坐窺霽宇

凌晨急啓扉。雨細不溼土。乃省夜來聲。風葉交相舞。

白門初尋無補

別君歲辛未。寒暑今三往。昨歲寄我書。云宅秦淮上。薄竹影草堂。天地此中廣。我來挂秋帆。江梅照兩漿。登堂不暇揖。汲汲話今曩。我游君暫居。各受山水養。拜手告遊情。導我踏空朗。

清明高梁橋同顧孚尹王敬哉遇雨

霽煙護柳陰。茫茫沙塵影。斷聞溪香。沿溪來往人。遊冶人聲齊。向溪中寫歌。不能停酒欲空。弃壘理策心。匆匆。

李卓吾墓

此翁千古在。疑佛又疑魔。未效鴻冥去。其如龍亢何。書焚焚不盡。老苦苦無多。卓吾晚年著書名老苦潞水年年嘯。長留君浩歌。

喜葛震甫歸自固陵

冬聞君始出。意外得君回。鬢滿崧高雪。衣香江上梅。見遲增別緒。遊老健詩才。款款青溪上。古今懷抱開。

王袞七首

袞字補之。一字幼迂。益都人。貢生。有四雖軒、慧業軒二集。

榆墩逸稿。今之能詩者。才人則益都王補之。其言超忽英麗。風起霞變。

田按。衰之名在復社。詩格斬新。不落當時成派。大滴水巖一篇。有玉川子之風。

送家兄北上

青油六尺車。中有千里道。祖席秋風園。清晨自糞埽。豈不念弟兄。團圓暱邇好。出處各有期。振名惡草草。衰門望寵光。窮檐待襁褓。國論在今日。羣谷走秋潦。富貴何足言。竹帛真可寶。

大滴水巖

天公訶鬼鞭鰐鯨。鳩嵐庇霧爲雄城。上削千仞露毒齧。旁旋一曲開掀鐺。君看巖巔上注水。此豈有物相搏攫。乃知東歸及潤下。曲儒之說談何輕。黃琮白琥墮破碎。衝牙雜珮行敲鏗。茅檐滴溜見簌簌。糟床瀉酒聞丁丁。千尺下屯油黝綠。一畝不動天清明。賞去徑須買茗具。汲不悔來攜瓶罌。猶訝鐵削無寸土。走松攢檜相挈爭。冬卉縱枯香可認。得非射干與杜蘅。匹鳧儔鷺各喑喋。素鱸文魴恣逢迎。人間勝絕自卻擲。留與魚鳥爲寮閔。王維鄭虔骨已朽。倩誰貌此歸宗生。嵌巖題句欲紀勝。千塗萬竄終庸平。山川奇麗詩羸拙。山靈定自嘲我僮。以茲俯臨不敢照。正恐塵土颯溽泓。乃聞貴遊將築第。鳴鑼呵道松蘿驚。無論猿鶴解拒客。名朝利市終牽縈。我今不來戀底物。逝將買此開柴荆。村農少械正足友。坂田雖瘠猶堪耕。文杏壓油清可鑒。靈柿醲酒甘難名。松柴半日斫成碌。石屋千錢疊爲甍。若須成名訖婚嫁。何異坐俟河

之清。

午睡

檣床湘竹細。鈎幔越羅輕。枕畔殘書墜。盂邊渴鼠行。堂虛煙正直。心靜夢分明。莫報閒書札。吾方稅赤城。

幽亭

亂葉結幽亭。山當四面青。溪連寒靄汲。門共野雲扃。剩擁書千卷。寧須帶萬釘。匡牀過馴鹿。機事已全冥。

愁

閱盡浮生曲折愁。拌將百念放歸休。虛名與夢觀何異。徂歲如駒挽不留。天上有方期鍊骨。人間無地與埋憂。功名碌碌尋常事。猶恐無兒似鄧攸。

送唐右文留都地官

候吏江邊炬火迎。征帆齊指秣陵城。曉趨畫省踏花去。夜泛清溪載鶴行。燕子磯頭潮未落。謝公墩上月初生。可憐高髻長干女。一曲吳歌惱客情。

遯思

稷禹期身事本賒。休哉歸去理煙霞。倦遊寧復期千里。漸老徒思著一家。人似右軍惟種果。業如鴻漸但名茶。明時隱退誠何有。譬損恆河一粒沙。

嚴首昇四首

首昇字平子。華容人。崇禎中拔貢。鼎革後削髮爲僧。有瀨園集二十卷。

田按平子論明詩推李空同徐青藤湯義仍不許與竟陵而所作乃與竟陵無殊惟七律音節嘹亮曾入復社與孫孟樸通聲氣集中有上某尙書一書卽楊文弱也詆斥甚力可謂公論而鄧湘皋謂武陵受謗由瀨園一札矯誣無端夫武陵之惡天下共知豈待瀨園一札湘皋之論亦鄉曲阿好之私而已。

石頭菴

到岸江河永。朦朧山可登。更乘未落月。去訪旣眠僧。方丈存雞犬。柴門補樹藤。回看舟在下。塵市總峻嶒。

下第

寥落風塵獻策頻。金裘何地不西秦。門垣半圯凝塗茨。兒女相憐似故人。世亂一身歸已足。年豐百指計猶貧。還家下第如登第。親舊填門過一旬。

種菊

墾山芋栗舊盈廊。更插籬間菊數行。萼滿客應知冒雨。苗移人已意重陽。從今賜姓非陶氏。共爾長年到雪堂。家在石門天半裏。不須九日問高岡。

孟倫壻爲予築室山中每至則招故人小集

終慙轍迹與人同。谷口頻來意始同。無幾親知投世外。有緣兒女嫁山中。衲衣久久皆諧俗。竹杖徐徐欲御風。似此行窩便徙宅。不煩迎送娛兒童。

莊祖誼三首

祖誼字宜稗。成都人。

靜志居詩話。全蜀入復社者八人。宜稗詩名特著。惜流傳無幾。

岑公洞

詰曲巖前路。欹斜洞口碑。瀑飛千尺雪。雲養萬年芝。虛谷樵相答。危龕月倒垂。到來幽絕地。乍可脫塵羈。

甲午除夕

丙夜平頭近燭光。誦誦苦語訊行藏。花笻雪舫奚生計。翠管銀餅幾拍張。去日已驅丸下坂。來朝更值偶登場。綺疏曲彙紅泥煖。卻拍誰家柏葉觴。

九日雨花臺懷古

雨花臺畔踏秋行。懷古登高雜感生。六代尙餘衰草色。三山猶枕大江聲。祖龍黯黯藏金氣。泥馬虛無化石城。搖落不堪頻悵望。夕陽殘笛總關情。

趙士喆十二首

士喆字伯濬掖人貢生鄉人私謚文潛先生有觀物齋詩東山詩外

濤音集西樵曰文潛詩瀏灑頓挫頗宗少陵古今諸體淵源並遠其放筆坦縱時近蘇陸要是豪人本色至遵海大節近扳謝鄭遠婉夷齊余挽文潛詩云縱使魂兮化朱鳥也應獨食首山薇蓋執鞭之願於此在矣

漁洋詩話伯濬甲申後避兵登州之松椒山遂不歸與弟子董樵耦耕海上著石室談詩建文年譜遼宮詞若干卷弟士亮士冕皆能詩

靜志居詩話伯濬倡山左大社以應復社捍鄉里之牧圉效信國之集句嘗削稿縱談天下事思上之朝見陳啓新用事恥之不果顛沛終老殆臨江節士扶風豪士之流

詠懷

磨刀苦不利刀利傷人指。締恩苦不濃恩濃爲怨始。獨坐恍然嘆命駕適都里。都里何繽紛裙屐遊閒子。握手惠若蘭目笑語以耳。相得詎不歡達人悲所止。甯知君子心澹澹如明水。

詠懷五平

陽春風初和驅車游皇州。平原明朝輝層城如雲浮。高楊緣長川丹霞棲瓊樓。驪駒誰家郎翩翩臨清流。雕弓飛金丸銀鞍懸吳鉤。從禽平陵東還歸倡家游。胡姬顏如花琅玕爲搔頭。留君調新聲哀歌彈箏篴。清宵華燈張輝煌羅衾裯。人生當爲歡誰能長憂愁。嗟嗟元經儒窮年無時休。

哭徐行吾

造化如小兒。修短紛相錯。賢人構龍蛇。君子爲猿鶴。里中書信來。使我悲且愕。我知君夙心。化去如解縛。所悲道義交。筆硯從總角。夜來忽夢君。落魄猶如昨。方悟隔幽明。遽然分夢覺。三復少陵詩。神交付冥漠。

擬遼宮詞九首

銀甕交爭忿未平。六龍親駕復西征。安邊自是男兒事。枉卻當年嫁義成。雉尾交輝寶蓋飄。欣瞻御像降丹霄。天王眉宇傾夷夏。北極羣靈夜夜朝。年來南北靖烽煙。西夏高麗各晏然。聞道中朝相司馬。至尊祕敕慎開邊。自解衣冠策晉王。石劉兩主號兒皇。河山不改雄圖盡。白髮宮娥淚萬行。燕京容易便迎降。誤我艱難到海邦。草草束裝如夢裏。賜釵忘卻在西窗。頭魚燕罷醉顏酡。那辨夷歌與漢歌。怪道賽神仍撲馬。洛陽天子卽沙陀。南國知名花見羞。久應無復舊風流。美人自分甘黃土。誰洒徽陵飯一甌。李子纔熟穿杏衫。清和天氣像江南。記得去年今日雪。近臣煖帽侍朝參。大梁清禁隔蓬瀛。仙眷何來五國城。共矢餘年持苦行。漢宮環珮乞來生。

伍瑞隆二首

瑞隆字國開。一字鐵山。香山人。天啓辛酉舉人。除化州學正。累遷河南□□。有懷仙亭草。

漁洋詩話。東粵詩。自屈程梁陳之外。又有王邦畿說作。王鳴雷震生。陳子升喬生。伍瑞隆鐵山數人。皆有可傳。

懷仙

采石長庚客。金門太歲精。術甯因授得。丹豈為燒成。酒氣開雲日。詩情破死生。寄書曾不到。誰遣鶴相迎。

長洲煙雨

煙雨濛濛溪水頭。長洲莫卽是瀛洲。憑君為撥羣峯看。似有玲瓏十二樓。

宋璉一首

璉字林寺。萊陽人。舉人繼澄子。崇禎己卯舉人。

在梅溪故舍有感

蘆中窮士泛天涯。誰向王孫進白麻。孤劍常依江上草。故人應傍日南花。五年關塞悲春雨。一葉鄉山落暮鴉。何處漂零獨不見。於今幾是魯朱家。

劉湘客一首

湘客字客生。富平人。過日集作宜君人。諸生。唐王立以薦授汀州推官。遷御史。桂王時。改編修。歷中允。侍讀。侍讀學士。少詹事。改僉都御史。以事下獄。尋釋免官。大兵下桂林。匿賀縣山中死。

田按。客生名在復社。

登虔州望江樓

望迷北極連西極。坐看章臺卽貢臺。隔岸下春燈漸出。傍城古木鳥飛迴。高樓萬里三人醉。叢桂雙江九月開。□□□□□□□□。自知不是漢廷材。



明詩紀事卷二十六

辛籤

吳惟英二首

惟英字國華。蒙古人。先世把都帖木兒。嚮化來歸。賜姓名吳允誠。以功封恭順伯。允誠子克忠。進爵侯。數傳至惟英。襲恭順侯爵。總督京營戎政。有墨響齋集。

靜志居詩話。國華累葉珥貂。風流獨擅。崇禎中。與鞏都尉永固。並留心圖史。與諸朝士極文酒讌游之樂。家有墨響齋。摹拓金石文字。裝池插架。不減歐、薛、洪、趙之富。孫舍人枚采其詩入燕都游覽志甚多。其後都中大疫。國華死爲冥官。時降於室。襲尙書孝升。曹侍郎潔躬每述其遺事。以爲可載。鬼董狐。

田按。萬歷中武將能詩者。蕭如薰、杜文煥、鄧子龍、戚繼光輩。皆身歷戎行。若臨淮侯李言恭。則勳臣後裔。如漢之四姓。小侯。雍容儒雅。說禮敦詩。國華稍晚出。衡其詩品。可與臨淮抗行。世傳國華死爲冥官。李舒章有詩紀事云。憶昔相逢金市東。當場綬帶萬人中。不知青骨真如許。已見民間賽火紅。

集宜園

客約鄒枚侶。名園許共攀。早花須著眼。春酒更開顏。鳥語藏深樹。雲痕斷遠山。分題期刻燭。有句倩誰刪。

遊李武清新園泛舟

海淀微嫌道路長。背城特地又新莊。登舟我欲偕元禮。選石君宜學贊皇。環樹依臺渾是水。繞花沿柳半爲廊。莫愁酒盡雙瓶倒。村店青帘帶夕陽。

張怡十首

怡、一作遺。初名鹿徵。字瑤星。上元人。都督可大子。以諸生蔭錦衣衛鎮撫。歷正千戶。甲申後隱居攝山。自號白雲道者。有古鏡菴詩內外集、玉光劍氣集。

方苞望溪集。甲申流賊陷京師。怡遇賊將不屈。械繫將肆掠。其黨或義而逸之。歸故里。身寄攝山僧舍。不入城市。鄉人稱白雲先生。當是時。三楚吳越耆舊多立名義。以文術相高。惟吳中徐昭法、宣城沈眉生躬耕窮鄉。雖賢士大夫不得見其面。然尙有楮墨流傳人間。先生則躬樵汲。口不言詩書。學士詞人無所求取。四方冠蓋往來。日至茲山。而不知山中有是人也。先君子與余處。士公佩歲時問起居。入其室。架上書數十百卷。皆所著經說及論述史事。請貳之。弗許。曰。吾以盡吾年耳。已市二壘。下棺則并藏焉。卒年八十有八。或曰。書已入壙。或曰。經說有貳。尙存其家。乾隆三年。詔修三禮。求遺書。其從孫某以書詣郡太守。命學官集諸生繕寫。久之未就。先生之書。余心嚮之。終不得一寓目焉。并著於篇。俾後有感發守藏而傳布之。毋使遂沈沒也。靜志居詩話。山人生時。園中鹿亦產子。因名鹿徵。而以瑤星爲字。崇禎間。曾仕錦衣。故其六十初度詩云。當年執戟侍明光。親見彤雲捧玉皇也。山居鈔書頗多。著述甚富。予所見者。僅玉光劍氣集。謏聞正續筆數種而已。蓋造其山居。見案頭有手鈔宋季張炎叔夏詩集一卷。今其遺書不可復問。詩亦流傳寡矣。

金陵諸園詩并序

南中人家好爲園林。雖短檐茅屋，室不數弓，而纔有隙地，便種花竹。當昔太平盛時，六部曹郎於公署外各構一園，皆在長安門東一帶，廣狹或殊，咸極整麗。其他如中常侍之外宅，僧舍之別圃，諸縉紳之會館，非園而園多可遊者。今皆鞠爲茂草矣。其在西南者，亦與蒼海俱變。言之傷心，不堪著足。因憶少時所曾遊者，略述梗概，以誌憑弔，不能盡記也。

半山園在朝陽門北，有堂三楹，流水一灣，發源鍾山，而繞堂下。前互小山，喬木數十株，二百年物也。凡園中邱壑，多以人力爲之，而此獨真。山真水最爲勝地。

疏籬曲徑隱林泉，邱壑從知出自然。想見當年王介甫，騎驢裹餅到門前。

小東園先大父榮祿同野公燕居也。從世雅堂右折而南，亭軒三楹，荆川題曰白鶴山居，左曰裁雲閣，先世藏書之所。叔父紫淀老人寢處其下，堂後曲室爲岱輿，仲父丹室，從堂右，牡丹臺旁。

磴而上，中踞一亭，亦曠亦奧，則季父四圃，篋老人讀書於內，後紫淀老人盡棄所有，作攜書避亂圖而出，仲父丹室中懸小像，來居者以爲仙翁，而頂禮焉。今盡荒地矣。

世雅堂邊舊隱居，竹房丹竈富藏書。自從避亂流離後，白鶴橫空我不如。

韓園外父襄宇韓公家園，在翦子巷，壘石爲山中一峯，高二丈餘，宋諸名公題跋甚多，漫滅不可辨。公從徐氏東園購之，洵異物也。此園後歸黃岡石公，象雲每過不勝西州之痛。

如公好石真成癖，纔得爲園境已遷。何似中山厓壑好，春光秋草自年年。

裴園家幼仁六兄裴園，在鷺峯寺前，洛錦塘側，荒疏有致。兄善畫，能詩，尤留意花木，歲釀好酒數十莖，令童子持至花市上賣，花市魚肉而歸，客至則開家釀，翦園蔬治所市物，以供杯酌，亦閒居之樂事。文人之佳話也。後易主避客，言念昔遊，何啻太古。

從來勝地須賢主，太息纖兒無上賓。深鎖朱門堅拒客，閒庭辜負十分春。

栝園 在大功坊東巷內初沈生予得之魏國家數易主而歸周樂園堂三盪敏而受風寬而宜月老

栝兩株亭亭直上園之得名以此中多石石亦最奇而皆具玲瓏透露之致池水一泓朱鱗數百水閣三間可以忘暑

奇石欲下米顛拜虛館曾披宋玉風焉得從君分半榻翦蒲種藥作園翁

齊宗侯園 齊宗侯卓吾園在南郭西天寺旁樓閣宏敞花竹蕭疏曾歸吾友姚寒玉去予松風閣一里而近每與同人銜杯拈韻嘯傲其中

赤石磯旁榴乍吐德恩寺後杏初肥王孫公子東西去惟有高城戀夕暉

雲乳山房 予性愛園居昔人所云志在兩株樹十莖草之間耳初居海石園在杏花村旁蕭公廟後次居寒山園在南郭窰灣內與今佟園衡宇相望也後卜居武定橋東屋內小園曰譚樂

頗可晏坐而素畏婦人聲雞犬聲婢僕詭譎市人喧鬧聲乃於橋之極東迴光寺前得倪園而長夕焉自滄桑後流離顛沛不得復購園居就雨花山閣為先莊節掃地焚香冀畢餘生而乙亥之夏閣前松竹盡遭斫伐觸目愴懷不堪聞見乃茸攝山之雲乳山房而投老焉此金陵第一大花園也僧徒居其中而日用不知游入涉其境而神情不屬乃以獨享為愧耳

園居興盡卜山居東澗中峯盡不如慚愧徵君開關後容予高臥理殘書

海石園 海石高二丈許徑三尺有咫在海外之廟島西山口內具四面相玲瓏透漏作雲旋文海氣所蒸五色相宣文彩爛然先莊節治兵海上見而賞之座客曰是屢經匠石之顧卒不可致

有宋都統某留題深以為憾先莊節笑曰物各有緣石丈人得時則駕豈憚一行耶呼健兒舉之石果移似有神助願自山巔下視海面可萬丈而羸懸崖絕壁勢不能下材官應募而出適高麗貢馬船至乃取木於山取纜於船縛木為梯以纜繫石千人邪許道耶載歸置清嘯堂前未及豎甚舉酒醉曰予與君固夙緣互數千年堅臥不改今乃忻然就道耶載歸置清嘯堂前未及豎立值先莊節公殉國事家餘四壁遂鬻此園為伏闕費園中幽房曲室最為雅觀小池迴廊不廢遊覽予讀書其中者五年後歸陳中丞幼白而此石竟沉埋土中不復能位置矣

海上相逢石丈人移來南郭伴松筠祇今院宇淒涼甚誰向仙山再問津

寒山園予內兄韓敬修手開也前臨濠水後枕平岡入門水閣三楹流水周而清竹萬竿濃陰布護

月正望臨風小泛
覺玄真去人不遠

門前流水枕寒山日日車居山水間況有扁舟堪載月塞洪橋畔赤磯灣

倪園笑峯大師所講也時笑峯尚為小司農在燕邸予以二百鍰得之門前老屋數間右有亭三楹

此仍歸倪氏

野水瀾漫古寺旁四圍老樹間修篁高樓縱目渾無礙遙對城南石子岡

劉文炤一首

文炤字雪舫宛平人新樂忠恪侯文炳弟有攬穗堂偶存

魏禧叔子集余客秦郵劉君雪舫訪余余報謁君出其一門殉難紀略及鞏都尉城破自到事示余受而讀之拊膺泣下幾不能終篇方中申三月之變君年才十有五歲又生長貴戚宜縱心聲色自驕倨不學問乃其所紀殉難本末於天子孝思劉氏先世所以興母若兄捐軀殉國之大節都城所以陷敗雖倉皇急遽中一言一事莫不條理委悉使讀者如目見耳聞而悲憤感激勃然作其忠義之氣君好學工書其入燕游草悲涼抗壯不忍多讀

阮學葵茶餘客話劉雪舫新樂侯文炳弟侯闔門殉難雪舫年十五逃回海州故里變姓名至淮居珠湖吳蒿三珊物色之贈詩云王孫徒寂寞芳草自萋萋故苑游麋鹿滄江厭鼓鼙人情隨世變風氣逐年低念子凝神久微陽可共攜

清河夜泊

孤舟離緒又清明。一挂蒲帆千里程。去住向誰商出處。飄零到我負平生。雲連海氣天無色。風鼓河流夜有聲。襪被春寒眠不穩。悽然雙淚落三更。

祁班孫四首

班孫字奕喜。紹興山陰人。都御史彪佳子。祝髮爲僧。有紫芝軒稿二卷。

鮪埼亭集。祁公子者。忠敏第二子也。初忠敏夫人商氏嘗夢老衲入室。生公子。美姿容。白如瓠。而雙足重趼。頗惡劣。日堪行數百里。忠敏死未二旬。東西兵起。祁氏羣從之。長曰鴻孫者。故嘗與忠敏同講學於蕺山。至是將兵江上。思以申忠敏之志。而公子兄弟罄家餉之。祁氏自夷度先生以來。藏書甲於大江以南。其諸子尤豪。喜結客。講求食經。四方簪履。望以爲膏粱之極選。不歷而集。及公子兄弟。自以故國之喬木。而屠沽市販流。亦兼收並蓄。家居山陰之梅墅。其園亭在寓山。柳車踵至。登其堂。覆壁大隧。莫能詰也。慈谿魏布衣耕者。狂走四方。思得一當。以爲亳社之桑榆。公子兄弟則與之誓天稱莫逆。魏耕之談兵也。有奇癖。非酒不甘。非妓不飲。禮法之士莫許也。公子兄弟獨以忠義故。曲奉之。時其至。則盛陳越酒。呼若耶谿娃以薦之。又發淡生堂王遁劍術之書以示之。又徧約同里諸遺民。如朱士稚。張宗觀輩。以疏附之。壬寅。或告變於浙之幕府。刊章四道。捕魏耕。有首者曰。茗上乃其婦家。而山陰之梅墅。乃其死友所嘯聚。大帥亟發兵。果得之。縛公子兄弟去。旣讞。兄弟爭承。祁氏之客謀曰。二人并命。不更慘歟。乃納賄而宥其兄。理孫公子遣戍遼左。其後理孫竟以痛弟鬱鬱而死。而祁氏爲之衰破。然君子則曰。是固忠敏之子也。祝髮於吳之堯峯。尋主毗陵馬鞍山寺。所稱呪林明大師者也。

田按。奕喜早矜豪侈。晚遁瞿曇。未忘旣死之灰。復誓揮戈之勇。君子哀其志焉。其詩哀豔動人。惜不盡合轍。

有懷

春晚愁珠閣。妝成卻翠屏。振珂風寂寂。捲幔瑟泠泠。玉塞憑高望。金鴻入夜聽。迴環依碧月。飄墜感流星。庭北花全落。城南柳半冥。王孫衣欲換。過客馬初停。句驪河邊渡。遼陽郭外經。孰憐三月路。草色未知青。

同楊生聽琵琶女侑酒帳中女故客維揚與楊頗舊

屠蘇帳中留醉客。紅爐炙火霜初白。好聽絃上奏琵琶。莫向風前吹鬢栗。琵琶欲轉夜鴻驚。絃撥涼州指再停。絃愁青海今宵月。指憶紅樓舊日情。紅樓承寵人爭羨。千金每買華堂宴。五夜明珠照不歸。七香寶輦邀曾見。會惜春城春晝長。嗁鶯飛燕斷人腸。葡萄北苑初裁錦。翡翠南洲就點妝。妝罷還曾催上馬。經過更出章臺下。帳底流蘇笑暗窺。枕上珊瑚欣獨把。自信容光不讓人。可憐意氣劇相親。天挑猶煖城邊日。青冢空回家上春。春日秋風當此夕。羞將玉面逢人出。千古繁華妾已忘。一時歌吹君能憶。曲罷星疏虜酒寒。明朝馬上引人看。已令胡女無顏色。何須更奪燕支山。

送王雙白侯記原渡西陵作

江亭樽酒暫淹留。惆悵行旌促遠遊。三月飛花懷故里。一帆寒雨送歸舟。青山過處同爲客。尺素來時獨倚樓。最是月明無近遠。徘徊搔首望南州。

少年行

素袍逢月白。寶劍入秋寒。近聞灌夫死。不敢上長安。

劉孔和九首

孔和字節之長山人大學士鴻訓子有日損堂詩集

池北偶談劉孔和王遵坦二人皆負氣踈馳相交善王居桑谷劉居長白皆有林泉之美崇禎間見天下將亂散財結客甲申歲孔和殺闖賊偽令率精騎萬人南赴金陵至淮陰以兵屬劉澤清清與孔和素交好時爲藩鎮貴重無比然好爲詩一日大會將吏廣坐朗吟賓佐交口譽之孔和仰視獨無語強問之曰公誠名將才然此事定復不急澤清怒罷酒賓客皆惶懼失次孔和傲然而出澤清益怒道人追及舟中拉殺之已而金陵以爲副總兵官則孔和死數日矣嘗有贈王詩云都無殺者黃江夏豈有食之嚴鄭公後竟死澤清手與黃祖事絕類云漁洋詩話劉孔和爲詩豪邁雄放有東坡放翁之風一代奇才也靜志居詩話節之詩好排硬語大約以孟郊邵謁爲宗田按節之人奇詩奇死於悍將之手傳其遺事千載猶有生氣

雜諷三首

少陵詩竭情右軍書趁媚譬如今雅琴乃是古鄭衛軒燧久不作紛紛弄文筆此語固頗高何以處衰季多巧傷元化僞古愈堪畏強擬皇娥篇勦取响屐字不如求真至辛澹皆可味世談神仙事往往慚未安捫日求盤燭疑信良皆難此道貴艱苦挽舟上急湍火以藏深遲冰以埋陰存但恨庸妄輩匍匐求崑崙何物覆笥籍累累日以繁吾儒匪相賤所以尊乾坤乾坤籊元化豈開大盜門

松柏堅而壽。巖石靜而完。熊經能自引。龜息無所餐。方之彼仙人。當作如是觀。松伐石且斲。熊烹龜亦鑽。千秋消盪盡。神氣何棲蟠。淮南叛諸侯。趙高賊宦官。神仙固有此。何足容褒彈。因之謝來學。甚勿食馬肝。豈復雲山意。干戈滿吳會。況予強臥時。空憶天涯外。一別離菊前。露下浩不收。秋冬難爲懷。何以行扁舟。汴路旣零落。白門復蕭索。欲賦哀江南。遙遙不可得。故宮蔓寒蕪。豆紃想崩壞。惟有孝陵樹。重涕堪再拜。江氣日夜發。暝暝阻春煙。念之何時歸。歲暮當來還。

題凌五雲畫冊

霜翎蠹葉關幽細。十幅秋光意亦遐。蜂抱花鬚驚鳥見。藤牽石骨得苔遮。一枝不奈成淒斷。數點無因想淡嘉。折作屏風剛數曲。自支寒枕看橫斜。

長兄齋中蜀海棠一木姿態甚殊便使同作

金谷園中謬作家。碧雞坊裏厭繁華。魂銷深院霏微雨。光散晴窗旖旎霞。輕翠數描依榦葉。新紅百浣覆枝花。遙知澹思經營際。已許籠詩著絳紗。

過訪幼量書圃二首

塔前修竹綠成林。侍子清朝拊素琴。聽盡明光三十段。碧池涼雨一時深。

石紋苔色上窗紗。綠茗初煎更筍芽。遲日園林花氣合。十分鶯蝶在人家。

題趙吳興調琴啜茗圖

秋宮肅肅古衣裳。靜女無愁黛亦蒼。不點疏螢和月色。絹頭已作百年涼。

茅元儀二首

元儀字止生歸安人。崇禎初以薦授翰林待詔。尋參孫承宗軍。改授副總兵官。守覺華島。兵譁論戍。有賞心集八卷。淪水集六卷。西崦集三卷。江春集二十卷。橫塘集十卷。又峴集五卷。在禁詩一卷。山草二卷。

茅元儀暇老齋筆記。石室老人以書法畫竹。山谷老人以畫竹法作書。然不闡破三昧。或曰。畫竹榦如篆。枝如草。葉如真。節如隸。余以爲枝如草。其意向在影響間。節如隸。不如葉如隸也。我嘗有詩曰。八分爲葉篆爲枝。然恐得其形似而未得其用筆。又曰。葉如蟹足折斂。枝篆之一語。古人曾云。其三者則余直揭破祕藏矣。

列朝詩集。止生好譚兵。通知古今用兵方略。及九邊阨塞要害。口陳手書。歷歷如指掌。東事急。慕古人毀家紓難。慨然欲以有爲。高陽公督師。以書生辟幕僚。與策軍事。皆得要領。嘗出塞相視紅螺山。七日不火食。從人皆無人色。止生自如也。高陽謝事。止生亦罷歸。先帝卽位。經進武備志。命待詔翰林。又以人言罷。己巳之役。高陽再出視師。半夜一紙催出東便門。僅隨二十四騎。止生腰刀匹馬以從。四城旣復。牒授副總兵。治舟師。略東江。旋以兵譁下獄。遣戍漳浦。東事益急。再請募死士勤王。權臣惡之。勒還不許。蚤夜呼憤。縱酒而卒。止生爲詩文。才氣蠶涌。搖筆數千言。倚待立就。而其大志之所存。則在乎籌進取。論匡復。畫地聚米。決策制勝。集中連篇累牘。西江傾海。皆是物也。

紅心道中

十載驅馳地。戎衣衆駭看。郵人識舊僕。塞馬怯新湍。山遠迎雲易。原平落日難。何時酬聖主。殘卷石牀攤。
潞河與受之侍郎別次見贈韻

崩岸驚濤不可聞。新湍陟處手初分。共聽夜雨還傷我。獨趁秋風卻羨君。東閣祇贏鈔祕本。北山重補未耕雲。明朝淚落蘆溝上。也解隨流逐衛濱。

常延齡一首

延齡字喬若。應天人。開平王遇春裔孫。襲爵懷遠侯。國變後爲僧。號蒼谷。居湖熟村。種菜以老。

帝里明代人文略。喬若襲封懷遠侯。在京奉朝請。遇事敢言。疏凡二十上。洞切時弊。上鑑其忠。深眷注之。嘗清巨璫。王民籍產。命給之。蓋異數也。時科臣姜埰。熊熙霖劾首輔。上怒。御門命旗衛縛二臣。詔獄拷訊。喬若疏請開釋。而以文彥博救唐介爲輔。臣勸朝論。建之。宏光初。姦相馬士英引起元逆阮大鍼。喬若露章糾劾。未幾。挂冠去爲僧。號蒼谷。灌園自給。其沒無以斂。友人自生。胡生。釀金葬之。

田按。喬若國變後居金陵城東湖熟村。種菜自給。錢飲光湖熟種菜歌云。金陵城東湖熟村。中有隱者開平孫。通侯甲第今已矣。意氣豪華無復存。開平去今凡幾載。五王之後惟君在。往昔爭言青門瓜。如今獨數湖熟菜。紀其事也。

揚州

傷心幕府夕陽開。往事江南不盡哀。飲羽共憐黃鬪子。空拳猶奮乙邦才。誰知閣禍流無盡。已去天心挽

不來。宰相尙留乾淨土。北風吹裂舊旗臺。

胡長庚一首

長庚字星卿。應天人。駙馬東川侯胡觀裔孫。

金陵詩徵。星卿以爵讓弟。居馴象門外。守南康公主園寢。賣藥以終。

田按。錢飲光胡星卿茅屋歌云。白鷺洲接大江濱。牧馬兒來動成羣。先生避世何處去。合家住近公主墳。茅屋三間倚項脚。門戶敬斜草繩縛。籬外時聞樵婦喧。樹下每有漁船泊。先生田無一石租。糊口祇賴青囊書。春深婦子競鉏菜。水落弟兄公養魚。邢孟貞贈胡處士星卿詩云。榮榮畦中蔬。孑孑門前柳。畦以木槿藩。門用桑樹紐。中有避世人。言是東陵後。多年不入城。一卷常在手。可想見星卿清節也。

揚州

一片陰寒晝不開。笳聲淒絕角聲哀。文山自正千秋氣。諸葛空思十倍才。颯颯朔風吹淚落。沈沈西日送愁來。大招欲賦天難問。瓦礫拋殘上將臺。

陳震一首

震字東卿。益陽人。崇禎中武舉人。

山居暮春

雨後蘼蕪綠漸生。羅衣初試覺身輕。夜來春色撩人思。開盡梨花月正明。

余忼六首

忼字生生號鈍厂青神人崇禎時以蔭官錦衣千戶有增益軒集

鱗坳亭集鄞之西湖以賀祕監嘗游息於此故有小鑑湖之目借檻樓者故錦衣青神余君生生之寓寮也生生爲太保尙書肅敏公之後以尙書恩世襲錦衣其自蜀而徙燕非一世矣生生以明經起思由甲科進取故錦衣之官雖上而未任已而國亡謀結勳衛子弟兵以殺流賊不克逃至江南參人軍事又不濟始來鄞其時鄞之世家子弟喪職者多乃相與悲歌叱咤更唱迭和無虛日儼居湖上有七子詩社而生生最長社中奉爲祭酒嘗曰吾敢謂此間樂不思蜀也爰署其居曰借檻樓公在湖上陸披雲有觀日堂宗正菴有南軒陸雪樵有歲寒館生生之樓皆與相望詩箋往復听夕旁午蓋居樓中者一十年蜀詩崇禎末張獻忠據蜀鈍厂避亂江東賣古文詩子自給不喜入權貴人門權貴人卽求其片言隻字亦不可得平生一冠破不復補人號三頂折角巾鈍厂與趙民服周蓼恤也康熙時過江卒於瓊花觀時年七十九

獨酌

友人惠我酒。竟日延清歡。閉戶無人來。好鳥伴我閒。初旭升竹林。小窗明可觀。興來聊復酌。藉影相盤桓。幽寂性所好。瓶中香未殘。卽此無拘束。境靜神亦安。

卜居

臥隱仍無定。途窮數卜莊。有家何日到。老病滯瀟湘。道遠音書少。秋深客夢長。桃源今有路。恣意樂他鄉。元日遊石鐘山卽事

上日淹留客。登臨興幾長。無人覺來往。半晌對湖光。煙際雲相接。匡廬屬渺茫。浦中帆片片。望裏應春陽。

過吳門客舍爲梅花作主人酒間得三絕句

市上何人識故侯。青鞋皂帽稱心遊。相逢白頭留詩別。細雨孤帆下虎邱。遄歸見說爲梅花。鄧尉風光滿眼誇。我夢相逐便東去。一天花壓帽檐斜。花時歸客怕花殘。烽火漫漫道路難。斷送東風多少恨。憑誰留寄一枝首。

官舍

葳蕤瑣下雙青銅。盡日無人官舍中。花落花開春已晚。流鶯嘯過女牆東。

陳斌一首

斌、號蜚叟。江甯人。明末總兵官。有蘆籟集。

田按。蜚叟以徵兵至溟沙定洲之變。阻不得歸。流寓蒙化錦溪。築室植蘆。匾曰蘆隱。興雞足山無住禪師遊。結青蘆禪社。有青蘆辭云。我惟非癖愛蘆荻。趣在蒼蒼天一色。蜚叟詞筆奇突。胸次瀟灑。嘗著影問云。余素性賞山水。遇危泉峭澗。則窺影自呼云。爾誰氏子。來向水中遊。影不答。相矚久之。風驟響。林木震動。水波疊興。影隨動。其間短竹拳松。拂陰翠錯。異之曰。霜棧捲碧。醉墨堆煙。爾影欲索我詩乎。於是倒仗蘸綠。毋論峭石枯苔。儘意縱寫。隨卽乾去。又至蕭寺。敗案積塵。豎塵尾作字曰。淺莎浮白。老檜翻青。鸚鵡不來。芭蕉常寂。可以見其興趣矣。賞荷詩云。荷盤捲露霜棧綠。奇字鏘鏘麗瓊竹。是昌谷得意語。惜不多見。

贈范泰符

范子草樓纏竹木。我來題作古農家。騎牛葉落一身雨。問水風吹滿笠花。





明詩紀事卷二十七上

辛籤

王時敏二首

時敏字遜之。太倉州人。大學士錫爵孫。編修衡子。以蔭官尙寶司丞。進太常少卿。有西廬遺稿。容臺集。遜之武夷接笋峯圖。追踪子久。煙雲奔放。林麓深密。實爲畫中之詩。坐收幔亭奇致。歎服歎服。

梅村集。先朝論畫。取元四大家爲宗。繇石田山人後。董宗伯爲其成。奉常略與相亞。當其搜羅鑒別。得一祕軸。閉閣凝思。瞪目不語。遇有賞會。則遠床狂叫。拊掌跳躍。於黃子久所作。早歲遂窮其奧。晚蒼萃諸家之長。陶冶出之。解衣盤礴。格高神王。力追古人於筆墨畦徑之外。識者知其必似。玄宰嘗書爲古今第一。顧以八分推許。語陳徵君眉公曰。此君何所不作。吾當避舍。於尺牘師蘇子瞻。黃山谷。於詩倣白香山。陸渭南。固不止絹素流傳。以書畫專門已也。

鸞尾集。太常公風流宏長。巋然爲江左文獻。尤擅場六法。寸縑尺素。流傳海外。世之論者以比黃公望。而年壽亦如之。此非煙雲供養不能。

惲格甌香館集。婁東王奉常燻客。自習時便游娛繪事。乃祖文肅公屬董文敏隨意作樹石。以爲臨摹粉本。乃輞川、洪谷、北苑、南宮、華原、營邱、樹法石骨。皴擦句染。皆有一二語拈提。根極理嬰。觀其隨筆率略處。別有一種貴秀逸宕之韻。不可掩者。且體備衆家。服習所珍。昔人最重粉本。有以也夫。

張庚畫徵錄。太原王時敏性資穎異。淹雅博物。工詩文。善書。尤長八分。而於畫有特慧。嘗擇古蹟之法。備氣至者二十四幅。爲縮本。裝成爲巨冊。載在行笥。出入與俱。以時模楷。故凡布置設施。鉤勒斫拂。水暈墨彰。悉有根柢。平生愛才若渴。四方工畫者。踵接於門。得其指授。無不知名於時。海虞王翬其首也。

山靜居畫論。國朝畫法。廉州石谷爲一宗。奉常祖孫爲一宗。廉州匠心渲染。格無不備。奉常祖孫獨以大癡一派爲法。兩家設教。字內法嗣蕃衍。至今不變宗風。

吳越所見書畫錄。王鑑云。子久畫如天駿騰空。白雲出岫。在元季大家中。有超逸絕倫之譽。近代推太原奉常公。深得其三昧。戴熙習苦齋畫絮。煙客自謂得大癡之形。以形神俱得許麓臺。其實煙客得神更勝於得形。不自謂得者。謙詞耳。

田按。煙客續華亭之緒。開虞山之宗。太原瑯琊。一時匹美。石谷甌香。漁山皆親炙。西田得其指授。麓臺之衍家傳。又無論矣。入國朝三十餘年。歸然爲畫苑魯靈光。吳梅村西田詩云。到此身世寬。息心事樵牧。可以想其峻節高風矣。

西田感興二首

陰陰梧竹暗漁隈。小徑柴扉向水開。書喜旁行從衲授。畫乘閒興畏人催。殘霞映浦低紅樹。細雨滋花襯綠苔。最愛寒煙疏柳畔。雁行斜逐釣船來。

吳塘北去隔塵囂。老我閒門鎖寂寥。地僻禽魚神自王。境幽雞犬色常驕。猶嫌樹小難遮屋。卻喜船通不礙橋。安得南村素心侶。芋羹豆飯日相招。

李肇亨三首

肇亨字會嘉。嘉興人。太僕日華子。有寫山樓、率圃、夢餘諸草。

六硯齋二筆。亨兒有得雨寒燕回舊綠。被霜衰柳學新黃之句。陳眉公先生極喜之。然顧大涵五臆記京口陳從訓有衰柳學新黃語。余少時有雨檻蝸痕上。風枝鳥夢搖。後閱春風堂詩話。則宋人已有雨網蛛絲斷。風枝鳥夢搖句矣。

橋李詩繫珂雪與掃庵同主鶯社。工詩能繪事。所作如秋澗流泉。雖波濤不興。亦自清冷可悅。

靜志居詩話。吾鄉鮮巖壑之勝。然園亭之參錯。水木之明瑟。舟楫之沿洄。縱遊覽所如而不倦。萬歷以來。承平日久。士大夫留意圖書。討論藏弄。以文會友。對酒當歌。鶯社之集。譚梁生偕會嘉和之。先後賦詩者三十三人。事未百年。而閭閻故老。已莫能舉其姓氏。玉杯錦席之地。化爲宿草荒煙。惟李氏寫山一樓。尙未椒飛粉落。宛然靈光之在魯。錄珂雪作。不禁慨然。田按。會嘉畫不及乃翁。詩筆灑落略相似。

贈王修微女冠

旖旎溪雲淡蕩煙。水沈香氣暗衝簾。生綃白袷輕籠臂。粉頰青絲半顰肩。清許夜琴同鶴夢。蒨分曉黛入詩禪。散花手腕春風裏。自寫蓮經繡佛前。

畫景

霽色石橋流水。蒼煙沙隴人家。誰向曉風吹笛。江寒落盡梅花。

題魯孔孫仿趙松雪墨竹

蟠胸逸氣吐華滋。楚雨湘煙入夢思。秀絕家風誰得似。漚波亭子興來時。

金俊明六首

俊明、初名袞，字九章，更名後，字孝章。吳縣諸生，有春草閒房集。

汪琬堯峯文鈔有明既亡，吳中好事者皆棄去巾服，以隱者自命，儼然前代之逸民。既而苦其饑寒頓踣，有能初終一節者，且死，牖下不恨者，實無幾人。若金先生孝章，庶幾樂天知命者與。孝章補縣學生，數試於鄉，不見收，以焦氏易筮之，得蠱之艮，孝章愀然太息曰：天豈欲我高尙其事乎？吾將從此逝矣。謝諸生杜門，以備書自給。是時明猶未亡也。孝章小草師曹娥碑，行草師聖教序，兼工詩古文辭，間喜畫樹石，蕭疏有致。其墨梅最工，年七十，偏乞常所往來者賦生輓詩，其風流雅趣如此。

百城煙水，春草閒房在吳縣臥龍街西雙林里。金孝章所構宅後書齋也。公高蹈不仕，擁書萬卷，鑪香茗椀，日與四方名賢暨二子上震，侃詠歌其中。姜垓題春草閒房云：春水蛟龍臥，芳洲薜荔衣。經綸人半老，兵甲客仍稀。濟世名山大，編年信史非。行藏須鄭重，不是戀漁磯。

靜志居詩話：鄭虔三絕，孝章克兼之。兵後隱居廛市，介不可易。既卒，門人私諡貞孝先生。平生好錄異書，靡間寒暑。仲子侃亦陶繼之，矮屋數椽，藏書滿櫝，皆父子手鈔本也。

畫徵錄：孝章自號不寐道人，善書畫，長於梅竹。田按：孝章畫梅，余見數幅，皆用乾筆作幹，焦墨圈花瓣，氣韻生動。邵僧彌、高澹游輩畫梅均若此。孝章詩筆老蒼，彌多艱苦之音。

和致一韻

若木甯忘拂，羲和底易傾。百年如此日，孤抱欲誰明。野暮愁風色，寒煙斷雁聲。有堪良友共，衰老慰吾情。

暝愁

暝色兼秋集。荒園草路深。雨邊新雁去。風外細蛩吟。客老兵荒夜。秋窮孤憤心。廢書危坐久。疏漏正沈沈。

次韻海序秋日見懷

晚晚誰聞節。慨風夕陽荒。草徧吳宮。古人寂寞存微尚。吾道艱難有固窮。龍臥始高宜海澤。鳳棲雖老愛梧桐。論心此日應無負。肯逐驚沙類轉蓬。

題畫二首

率爾清溪泊。聞名輒邀試。客主不交言。寥寥並高致。長安馬頭塵。滾滾日三斗。笑殺孟襄陽。衝寒爲詩走。

題僧弘小畫寄公白

苦竹陰森石徑寒。齋空宴坐聳高冠。道人讀易無餘事。老鶴一聲秋磬殘。

陳洪綬十三首

洪綬字章侯。一字老蓮。又字老遲。諸暨人。國子監生。崇禎中。召爲中書舍人。國變後。削髮爲僧。改字悔遲。有寶綸堂集九卷。拾遺一卷。

張岱陶菴夢憶。章侯才足挾天。筆能泣鬼。昌谷道上。婢囊嘔血之詩。闕渚寺中。僧祕開花之字。力開畫苑。目無古人。旣錫郭恕先之癖。喜周賈耘老之貧。畫水滸四十人。爲周孔嘉八口計。四閱月而成。

畫史會要章侯以明經不仕賦性狂散研心書畫所作古人物世所罕及。

讀畫錄章侯畫得之於性非積習所能致昔人云前身應畫師若章侯者前身蓋大覺金仙何畫師之足云乎人但其工人物不知其山水之精妙人但訝其怪誕不知其筆筆皆有來歷有過平陽水陸社見吳道子真蹟數十幅歸謂人曰人謂章侯杜撰今乃知道子預做章侯豈道子亦杜撰耶章侯兒時學畫便不規規形似渡江揚杭州府學龍眠七十二賢石刻閉戶摹十日盡得之出示人曰何若曰似矣則喜又摹十日出示人曰何若曰勿似也則更喜蓋數摹而變其法易圓以方易整以散人勿得辨也初畫楚辭像刻於山陰再刻水滸牌見世及崇禎間召入爲舍人使臨歷代帝王圖像因得縱觀大內書畫乃益進故晚年畫博古牌略示其意章侯性誕僻好遊於酒人所致金錢隨手盡尤喜爲貧不得志人作畫周其乏凡貧士藉其生者數十百家若豪富有勢力者索之雖千金不爲搦筆也年五十一卒於山陰。

毛奇齡西河集洪綬好畫蓮自稱老蓮數歲見李公麟畫孔門弟子勒本能指其誤處十四歲懸其畫市中立致金錢初法傳染時錢塘藍瑛工寫生蓮請瑛法傳染而輕瑛瑛亦自以不逮蓮終其身不寫生曰此天授也生平好婦人非婦人在坐不飲夕寢非婦人不得寐有攜婦人乞畫輒應蓮嘗模周長史畫至再三猶不欲已人指所模畫謂之曰此畫已過周而猶嘒嘒何也曰此所以不及者也吾畫易見好則能事未盡也蓮畫以天勝然各有法骨法法吳生用筆法鄭法士墨法荆浩疏渲傳染法管仲姬古皇聖賢孔門弟子法李公麟觀音疏筆法吳生細公麟七佛法衛協烏瑟摩法范瓊諸天羅漢菩薩神鬼魏法張驃騎道經變像法公麟衣冠士法閻右相士女法周長史昉嬰法句龍爽倭墮髻法長史髻髻長史衣帶盤薄法吳生金碧宮臺林泉湍峙長陂豐卉法大小李將軍雲山法浩水法董羽溜水法河陽郭熙几幃尊卣餅罍什器戎衣穹廬番馬駱駝羊犬法趙承旨馬承旨小馬法承旨之子竹石窠木法趙大年鉤勒竹法劉涇墨竹管仲姬折枝桃牡丹梅水仙草花法黃檢校錢選鳥瞰花鬢點漆凸厚法宣和蠶蟬蛺蝶鱗螭蟾蜍蝦蟇法宣和亦雜法崔徐黃父子鸚鵡鳩法閻助教士安雀法雀兒黃蓮法於蓮莆羸法母延之。

圖繪寶鑑續纂。章侯能書善畫。花鳥人物。無不精妙。中年遂成一家。奇思巧構。變幻合宜。人所不能到也。漁洋詩話。陳洪綬以畫得名。亦能詩。有憶舊絕句云。楓溪梅雨山樓醉。竹隴茶香佛閣眠。清福都成今日憶。神宗皇帝太平年。靜志居詩話。章侯四齡就婦翁家。見新聖壁。登案畫漢前將軍關侯象。長八九尺。翁見下拜。遂以室奉侯。蓋繪事本天縱也。崇禎間。與北平崔青蚰齊名。號南陳北崔。有妾吳淨鬢。亦善花草。錢塘馮秀才硯祥詩云。吳興公子工花草。待制丹青步絕塵。三百年來陳待詔。調鉛殺粉繼前人。余每視其真蹟。所畫美女。韶冶絕倫。今則質本紛紜。多係其徒。豨水子。山子。司馬子。雨輩所倣。率皆蘊蔭戚施矣。詩頗饒逸致。

陸次雲湖壖雜記。兩堤垂柳。余幼時及見其盛。明鼎移時。皆摧剪伐。陳洪綬曾寫一圖。自題其上。外六橋頭楊柳盡。裏六橋頭樹亦稀。眞實湖山今始見。老遲行過更依依。若幸之而實惜之也。每放步其間。不勝張緒當年之想。

畫徵錄。洪綬畫人物。軀榦偉岸。衣紋清圓細勁。兼有公麟。子昂之妙。設色學吳生。法其力量。氣局超拔磊落。在仇。唐之上。山靜居畫論。陳章侯。崔子中。皆出羣手筆。落墨賦色。精意毫髮。僻古爭奇。各出幽思。子中人物外。他畫少見。章侯山水花卉。類有平淡天然之作。點染得元人遺意。僻古是其所能。亦其所短也。

田按。章侯論畫云。今人作家。學宋者失之匠。何也。不帶唐流也。學元者失之野。何也。不遡宋源也。如以唐之韻。運宋之板。宋之理。行元之格。則大成矣。又云。如倪老數筆。都有部署法律。大小李將軍。營邱。白駒諸公。雖千門萬戶。千山萬水。都有韻致。此論可以通唐。宋之畫脈。章侯人物奇古。山水雄秀。七絕瀟灑出塵。前有沈啓南。後有陳章侯。眞畫家宗匠。詩家逸派也。

失題

千里別無恨。有懷在醉翁。棹頭楊柳色。驢背落梅風。酒勸揚州女。歌聽吳市童。歸來茶正熟。生活竹溪東。

橋頭曲

歡宿鴛鴦樓。儂宿蘆葦渚。兩夢如一夢。明日何處語。

玫瑰

老來貪識春風面。嬾作徐熙落墨工。誰能添箇鳴春鳥。細雨宮愁十二紅。

書屏

奈有湖山一日緣。藕絲風裏歇紅船。幾時收拾情緣盡。坐得松龕二十年。

春詠

秋冬之際吾得病。雪屋松窗對佛燈。今日勞勞鶯燕日。百花深處臥詩僧。

南旺寄內

饑來驅我上京華。莫道狂夫不憶家。曾記舊年幽事否。酒香梅影話窗紗。

與某僧

當今無處不天涯。猶恨天涯無處家。喜得北山僧帖子。邀儂十日看梅花。

卽日

一百五日春郊行。三十六溪春水生。千秋館裏逢雨急。射的峯前看晚晴。

偶詠

不識如何笑作愁。東阡西陌且閒遊。兒童共道先生醉。亂折黃花插滿頭。

寄黃四林一娘

金樽酌我黃公子。玉管催詩林一娘。遙憶兩人秋思好。月明雙槩住橫塘。

詠陳瓊海棠

阿儂自負王曇首。細按紅牙紫鳳鳴。學得內家新曲子。海棠花下問陳瓊。

紅樹

霜螯琥珀莎薑紫。捧出當壚十五兒。恨殺秋山紅樹裏。獨無此事入新詩。

畫長公與恆如

愛寫圓通蘇子瞻。一年幾得兩三緜。老僧乞請伽藍去。溪水山花白布簾。

崔丹二首

丹字道母。更名子忠。字開予。又字青蚓。順天府學生。一云山東人。

無聲詩史。崔子忠。號北海。山東人。崇禎癸酉。董宗伯思白應宮詹之召。子忠遊於其門。甚相器重。懸想倪迂高致。以意爲洗桐圖。貌雲林著古衣冠。注視蒼頭盟樹。具逶迤寬博之概。雙鬢捧古器隨侍。娟好靜秀。有林下風。文石磊砢。雙桐扶疏。覽之令人神灑。想其磅礴時。真氣吞雲夢矣。子忠不惟善畫。更以文學知名於時。

靜志居詩話。道母以畫見知華亭董尙書。益自重。家最貧。有以金帛請者。概不納。有二女。皆善畫。萊陽宋司臬玉叔曾示予許。

旌陽移居圖。鬼物青紅。備諸詭異之狀。幾與龔聖與爭能。匪近日畫家所及也。甲申寇變。走近郊。匿陶穴中。不出。遂餓而死。復社一二集。道母均與焉。先後名字不同。

畫徵錄。順天崔子忠善人物。與陳洪綬齊名。號南陳北崔。

滴水巖二首

石以當空立。巖如急就成。雨花山廟溼。雷樹羽宮晴。絕壁洪荒在。陰疇晦朔并。古潭龍夜語。徐戛應泉聲。入不知高下。山春水似秋。星河平地看。雞犬半天遊。洞腹藏元氣。山根養洑流。白雲朝出宿。知是繞神州。

龔賢六首

賢又名豈賢。字半千。一字野遺。號柴丈人。崑山人。流寓金陵。有香草堂集。

讀畫錄。半千性孤癖。與人落落難合。其畫埽除蹊逕。獨出幽異。自謂前無古人。程青溪論畫。於近少所許可。獨題半千畫云。畫有繁減。乃論筆墨。北宋人千邱萬壑。無一筆不減。元人枯枝瘦石。無一筆不繁。通此解者。其半千乎。半千早年厭白門雜沓。移家廣陵。已復厭之。仍返而結廬於清涼山下。葺半畝園。栽花種竹。悠然自得。足不履市井。唯與方龔山、湯岩夫諸遺老過從甚歡。筆墨之暇。賦詩自適。詩又不肯苟作。嘔心抉髓而後成。惟恐一字落人蹊逕。酷嗜中晚唐詩。蒐羅百餘家。中多人未見本。曾刻廿家於廣陵。惜無力全梓。至今珍什笥中。古人慧命所係。半千真中晚之功臣也。

程正揆青溪集。半千用筆如龍馭風。如雲竹空。隱現變幻。渺乎其不可窮。蓋以韻勝。不以力雄者也。

王暉今世詛。龔柴丈隱居清涼山。有園半畝。種名花異卉。週堂下。鳥弄林端。日長無事。讀書寫山水之餘。高枕而已。圖繪寶鑑續纂。半千畫初從北宋築基。一變古法。沈鬱深厚。自成一派。

愚山集。龔半千像讚。人推詩老。自稱柴丈。名不可逃。俗不可尙。尊酒陶然。筆墨天放。投迹曲中。寄情霞上。盧見曾感舊集注。半千畫愛做梅花道人筆意。嘗自寫小照。作埽落葉僧。因名所居爲埽葉樓。畫徵錄。半千畫筆得北苑法。沈雄深厚。蒼老矣。惜秀韻不足耳。

秦祖永桐陰論畫。半千與樊圻、高岑、鄒喆、吳宏、葉欣、胡造、謝蓀爲金陵八家。田按。半千畫。濃墨粗筆。揮灑淋漓。冊葉小幅著色者。別饒趣韻。

一公得法東遊

師去忽經年。書來兩月前。持梅辭蔣廟。帶雪下吳船。道大終難隱。蓬飄未易旋。相思但相念。切莫寄詩篇。

何日山中住

何日山中住。山中廣置田。高原兒課種。精舍我閒眠。二月到八月。鶯天與笳天。總無愁苦法。那得不長年。

扁舟

扁舟當曉發。沙岸杳然空。人語蠻煙外。雞鳴海色中。短衣曾去國。白首尙飄蓬。不讀荆軻傳。羞爲一劍雄。久不得韓呂消息。

平生好遊歷。此別日偏多。嶽寺聽猿住。江鄉傍虎過。衰羸吾自念。疾病爾如何。短榻依然在。空房鎖薜蘿。胡介再過邗上。

相逢知不易。一拜淚潛然。此地又春草。吾生俱暮年。囊空出詩卷。廚冷動炊煙。耆舊今誰在。尊前各自憐。

晚出燕子磯東下

江天忽無際。一舸在中流。遠岫已將沒。夕陽猶未收。自憐爲客久。轉覺到家愁。別酒初醒處。蒼煙下白鷗。

歸昌世二首

昌世字文休。崑山人。崇禎末以待詔徵。不應。有假菴詩草。

列朝詩集。文休風神散朗。有材氣。善畫墨竹。能草書。與李長蘅交好。晚作和陶詩。爲程孟陽所稱。

無聲詩史。文休黑竹。枝葉清洒。逗雨舞風。有渭川淇澳之思。兼工印篆。

靜志居詩話。補熙甫長於筆而短於詩。讀季思文休作。覺後來者勝。

田按。文休太僕孫也。與叔父季思俱以節操名。五言有柴桑遺韻。

和陶雜詩二首

宇宙何茫茫。起滅同一塵。胡爲一日間。各營百年身。華堂與崇邱。去疏來者親。我廬非我有。四顧誰爲鄰。有如遠行客。當夕已戒晨。有懷不勝嗟。舉目皆勞人。

束髮萬里志。終焉老一經。夕秀復朝華。孺子多早成。老少不相及。時事亦變更。隱几靜焚香。和墨書黃庭。草莽無遠圖。不寐晨雞鳴。兵食仰東南。愴然傷我情。

歸莊一首

莊字元恭。崑山人。太僕丞有光曾孫。諸生。有恆軒集。山游詩。

靜志居詩話。恆軒好奇。世目爲狂生。善行草書。嘗題其齋居柱云。入其室。空空如也。問其人。驚囂然曰。邴邴傳之。謂可入啓顏錄。其名字屢更。崇禎中。忽請於學使者。改名祚明。自是以後。或稱歸妹。或稱歸平來。或稱元功。或稱園公。或稱懸弓。恆軒其別號。亦號普明頭陀。又號鑿鑿鉅山人。沒後。女壻金侃輯其詩文。名字一從其舊焉。侃處士俊明子。能詩畫。亦隱居不出。董含三岡識略。墨竹一派。自梅道人後。宜正間。則推夏昞。論者謂可比肩元鎮。徐渭。士問俱不及也。邇來畫者雖多。鹿城歸太僕孫莊。氣韻蕭疏。頗得古人遺意。莊川號鑿鑿鉅山人。性好奇。醉後揮灑。常畫巨幅。題一絕。貽予云。勁節寒姿是性生。颯然筆底作秋聲。吳兒只解稱朱鷺。柳葉蘆苗浪得名。

鑿琦亭集外編。世傳萬古愁曲子。瑰瓌恣肆。於古之聖賢。其相無不詆訶。而獨痛哭流涕於滄海之際。蓋離騷天問一種手筆。但不能定其爲何人所作。近人或以爲譚翁。或以爲道隱。或以爲石霞。皆鮮證據。惟魏勺庭徵君及其事於恆軒壽序。予始取而跋之。沈經詹事謂世祖章皇帝嘗見此曲。大加稱賞。命樂工每膳歌以侑食。古之遺民野老。記甲子。哭庚申。大都潛伏於殘山剩水之間。未聞有得播興朝之鐘呂者。是又一異事也。恆軒少入復社。於書無所不窺。嘗同顧推官舉師不克。行遯得免。書淫墨癖。遂以伴狂終身。

落花

枝上黃鶯漸露身。飛英歷亂墮紅塵。將隨薜荔依山鬼。難共薜蘿待美人。河北名園貪結子。武陵歸棹欲迷津。香車寶馬緣都盡。天與幽人一錦茵。

顧樵三首

樵、字樵水。吳江人。

今世說顧樵水詩篇秀絕畫亦屬能品嘗作秋林圖贈吳梅村吳歎曰對此尺幅使人幽思頓生
畫徵錄樵水有詩名善山水學石田翁與族人茂倫同里徐松之並稱高人

元夕後一日集通暉樓

燈火仍看滿禁城。良朋尊酒歲時晴。柳條猶待東風發。月色還同昨夜明。橫笛樓頭離別恨。落梅簾外踏歌聲。山陽舊侶雖無恙。逝水年華百感生。

題吳嶧山儀部讀書堂

門對長河煙水寒。閒鷗日日到沙灘。溪流汎出桃花片。知是山中春已殘。

竹橋池館

巉巖石磴水瀠迴。常有溪雲入樹來。行過竹橋通別徑。始知花裏有樓臺。

徐繼恩二首

繼恩字世臣。仁和人。貢生。晚爲僧。名靜挺。字復亭。有十笏齋詩鈔。

今世說徐繼恩少擢茂才異等。舉明經。遭亂不仕。隱於竺乾山中。天性英爽。不耐憂煩。嘗謂人非金石。立見銷亡。不若逃形全真。肆志方外。

圖繪寶鑑續纂。豁堂詩畫俱優。師仿元四家。

宿皋亭卻憶笠菴道人雪川次韻

空山雲影碧棱棱。極目寒原第幾層。煙樹倚天迷宿草。霜花緣路隔疏藤。鳥嘯古塔皋亭月。雁度虛窗蕭寺燈。惆悵我來君作客。卻尋高詠過吳興。

虎邱

虎邱石上夜嘯鳥。說法生公近有無。山寺鼓鐘還寂寞。吳宮花草半荒蕪。人從鶴市歸帆遠。客夢鷄陂落月孤。最是麻姑閒舞袖。乘風飛過洞庭湖。

文柵一首

柵字端文。長洲人。有慨菴詩選。

長洲縣志。端文從簡子。甲申後。奉親隱居寒山。父歿。徙居陸墓。與韓孝廉沐。方文學。夏結茅耕樵以終。畫徵續錄。端文畫山水。一稟祖法。所著有青氈雜志。

合流菴

合流門徑古。數里入松林。室小迎朝旭。牆高載夕陰。梅花臨澗發。竹色傍山深。隔嶺吾家近。還期早晚尋。

楊補二首

補字無補。一字曰補。號古農。先世清江人。移居長洲。

錢謙益有學集。無補壯歲遊長安。詩名藉甚。余賞其警句曰。閑魚食葉如遊樹。高柳眠陰半在池。以爲文外獨絕。書之扇頭。爭相諷誦。歸而與邢昉。顧夢遊。刻意濯磨。爲清新古淡之學。詩道於是大就。善畫。落筆似黃子久。

讀畫錄古農嘗畫小幅大不盈掌自題云永嘉郭外山川點點皆倪黃粉本也金陵明題此幅是龍友令永嘉時古龍遊經其地憶寫所見秀澹潔朗擅元人之勝龍友曾爲古農作小幅輒以相贈筆致亦絕類此可知良友氣味相入也王阮亭一絕云布衣曾說楊無補筆墨風流自一時留得永嘉遺跡在殘山剩水也堪思

龍友偕遊玉甌峯

舍舟白石村。籃輿遵澗麓。窈窕青翠光。盤旋上空曲。渾渾太古峯。巖巖壓坤軸。赤立起中天。頽然表太樸。我行繞厥趾。仰睇魂魄肅。有泉自顛來。霏霏落珠玉。霑灑溼暑衣。從風散百谷。凌晨眺巖霏。亭午穿巖腹。縹緲開精藍。因崖結爲屋。稍憩登頓勞。還依石牀宿。壑暝雲歸同。夜靜泉喧族。謝公行田處。微月照煙綠。曠哉棲真士。於此翔高躅。只今峯上頭。痕有雙白足。惆悵區中緣。明朝苦何促。

輕順閣看月和邢孟貞

海城清曠地。夏氣只如秋。此夜生明月。羈人共倚樓。蒼山橫玉笛。烏鵲近簾鉤。晚興坐超忽。鳴琴成獨愁。

周祚新一首

祚新字又新。貴州衛人。崇禎丁丑進士。授戶部主事。

程正揆青溪遺稿題周墨龍畫竹。此君寥寥三百年。雖如石田健拔。停雲超逸。不復見長。蓋以用法易得。筆難也。墨龍獨力追古。不踐不入。一時無輩。梅花復起。必曰似我。

廣陽雜記。周祚新。貴州人。弘光時兵部司官。遂家南京。善畫竹。號墨奴。今其遺跡已貴如拱壁矣。

無聲詩史。又新寫墨竹。得文洋州梅沙彌心印。蓋又新所藏多名蹟。而與可仲圭之襍材。咸萃青箱。故能爲此君傳神也。
黔詩紀略。又新擅詩。畫墨竹尤擅長。李專題墨竹云。琅玕三尺凡五節。節節思化仙。陂龍謂非與可不能辨。竟是黔人周墨龍。
又新爲楊龍友妹婿。收藏鼎彝書畫。不亞於龍友。惜其集無傳。

詠春水

湘娥細翦鸚哥翎。水仙綃帳鯉魚腥。天池浩瀚蒼溟溟。蔚藍倒映淵泓渟。楊花未飛蒲未長。縠紋蕩漾晴如紡。漪漪曲曲似有情。小小輕舸不用漿。

呂潛十首

潛字孔昭。遂甯人。大學士大器子。崇禎癸未進士。有洞宛、懷歸草堂、守閒堂、課耕樓等集。

漁洋詩話。呂潛字半隱。故明兵部尙書大器之子。亂離後流寓江左。有詩云。橫江閣外數帆檣。立盡西風鬢欲霜。只有鄉心不東去。蚤隨煙月上瞿唐。

畫徵錄。孔昭善花草。用筆放縱。而不越矩矱。神氣清朗可貴。性曠達。淡於仕進。入國朝。遂不出。以詩畫娛老。

吳興詩存。半隱甲申後避地吳興。愛山水清遠。遂家焉。春秋佳日。扁舟攬勝。與漁樵爲伍。人不知其貴介也。詩調新穎。書法似董文敏。畫亦有北苑筆意。其亦元真子、太白山人之亞歟。

送友蒼上人住水西

瓢笠歎無定。名山久待公。雪殘春路滑。雲過晚江空。道口馴岩虎。鄉心折塞鴻。還憎多慧業。詩句滿南中。

秋水園卽事

近午過重溪。亭空春草齊。幾家團市小。一寺背山低。花隱漁人路。香留燕子泥。前賢遺澤在。五夜尙聞雞。

邗江夏夜懷史赤豹蕭寺

飛鳥不知處。孤城生暮雲。吟邊誰是苦。鐘畔爾先聞。□□□王閣。風號故相墳。蜀岡有歸路。吾亦戀斜曛。

吳園次罷守吳興感贈

不悔無家計。蕭條傍雪村。經宵焚柏子。向月倚桐孫。楚塞煙波闊。吳船洞壑尊。有時念漁父。短服過柴門。

江陰晤年友張四若志感

二十年前別。重逢白髮生。登堂如有淚。對面各無聲。多難惟存骨。居貧不墮名。天涯兄弟少。悽絕動江城。

石亭寺樓與友人話舊

江濤如雪亂飛鴉。客裏逢人漫憶家。杜宇叫殘巫峽夢。鷓鴣聲斷嶺南花。天涯寄食無耕土。世外藏名有釣車。試看滕王遺跡在。西山空對晚煙斜。

汴梁

魚龍去後息兵爭。萬井依然禹甸清。望裏遺宮春草沒。吟邊古戍夕陽平。遊梁詞賦慚司馬。入洛年華異賈生。欲問夷門棲隱處。荒隄衰柳不勝情。

過蜀府

鐵券金符付劫灰。桐圭零落蜀王臺。誰從輦路鳴鞭過。猶記宣門拜刺來。智井寒泉沈鳳羽。天街白日走龍媒。短牆桃李家家發。畫角聲中杜宇哀。

歸雲菴偶題

竹院煙光合。秋山樹影分。自憐長作客。歸計不如雲。

邱垞望桃花

十里桃花岸。無嫌策杖遲。正宜稍遠處。最好未開時。

張輒四首

輒字大風。上元人。諸生有雙鏡齋詩。

讀畫錄。大風家貧。惟容膝地。每天雨湫隘。踣臥書案上。常累日。嚴冬冰雪。與鄰舍生談。裸脛立。或移漏刻。妻亡不再娶。大風畫無所師授。偶以己意爲之。遂臻化境。瀟然淡遠。幾無墨路可尋。秣陵畫家。掉臂孤行者。大風一人而已。貌頎偉。美髭鬚。望之似深山老煉士。工圖章詩賦。少時爲諸生。甲申後。遂焚帖括。衣短後。佩劍緜。走北口。出盧龍。上谷。覽昌平。天壽諸山。所至公卿爭相迎。大風揮灑應之。有中貴子招飲。邀館幕中。大風起立。瞪目不答。酒罷引去。一日興盡。卽治裝。衣舊衣。騎驢而歸。性幽僻。多寓僧寮道院。不一省其家。所爲詩若詞。皆秀警可誦。與人處。渾渾不露圭角。畫尾署眞香佛空四字。或稱昇州道士。畫徵錄。大風善畫山水花草。筆墨中之散仙也。

江村晚望

春來無幾日。碧草徧溪灣。爲看水中石。忽逢花外山。江船載酒賣。野老得魚閒。今夕多新月。柴門不用關。

落日

寒煙上邱隴。落日下羊牛。一澗碧泉響。四山紅葉秋。霜茅失樵徑。獵火見漁舟。歲晚罷耕種。商畝纔薄收。同劉旅皇飲借巢看菊

黃花開石屋。歲晚足摩娑。飲酒亦逃世。哀時恆獨歌。地偏風露冷。江逼雁鴻多。卽此成嘉遯。蒼生奈爾何。田園卽事

樹底雲生隔淺苔。花間犬吠出危橋。緣林麥熟經晨雨。艤岸船高入夜潮。計拙兒童諳稼穡。時違兄弟老漁樵。田園長更餘風月。村北村南酒滿瓢。

周容一首

容字鄧山。鄧人有春酒堂集。

徐文駒口口集。鄧山以勝國諸生。放之於酒。無日不飲。無飲不醉。其耿耿者不能自釋。或僧寮野店。忍泣吞聲。或賸水殘山。章皇慟哭。又以詩洩之。振筆一揮。清詞麗句。風發泉涌。傲岸突兀。獨來獨往。

麟琦亭集。鄧山先生少卽工詩。常熟錢侍郎牧齋稱之。謂如獨鳥呼春。九鐘鳴霜。所見詩人無及之者。錄其詩於吾炙集。國難後。棄諸生。放浪湖山。世多方之徐渭。非其倫也。先生以布衣詩人名。顧其素心。原不肯以山澤臞夸篇什者。卽其救徐御史心。

水一事要非東西京人物不足語此。先生未知名時，爲御史所識。御史一日遊山莊，爲士兵縛去。眞平西將軍王朝先營囚水牢中。先生故常來往海上，諸營多相識者，挺身往請之。朝先握手道故，遽釋御史歸。部下大譁，朝先武人，忽發怒下先生獄。榜掠之，足由是蹙。嘗自笑曰：吾今且爲半人。因別署蹙翁，最工畫，亦喜畫，飲酒數斗不亂，詆諧間作，輒傾一座。畫徵錄：鄧山善書工畫，疏木枯石，自率胸臆，蕭然遠俗，不拘拘於宗法。

丙申閏月晉陽寄懷固菴

朝遵滹沱涯，暮宿井陘脊。回首指燕關，燕關日先沒。朝上晉陽樓，暮望燕關月。作書久莫寄，封書還自發。寄書莫寄黃金臺，黃金旣盡徒蒿萊。獵犬追兔雙皆赤，何處一奠昭王杯。寄書莫寄擊筑處，沽酒不醉客易去。往事唯留易水寒，易水何嘗遶丹墓。寄書莫寄西山雪，春後作波流勿絕。杜鵑止在江南嘯，誰護陵傍花似血。寄書莫寄荊州君，大篇隻句天下聞。結客破家二十載，只今瘦馬隨時人。報國寺松雙樹亞，開元父老譚閒暇。市兒過盡生江風，一月幾回步其下。嗟嗟去歲入燕關，雁叫霜天衣袖單。投旅愧人問何事，南裝倉卒多旁看。明朝買驢強造謁，撲面塵埃路交窄。右讓雕鞍猶未過，左輪摩膝讓不得。下驢呼僕牽驢行，大宅華門多送迎。紛紛云是貴長者，廷尉丞相將軍名。黃色狐裘貂色紫，上鐙下鐙竟誰子。相逢垂手點頭偏，斜鞭直入明光裏。我一見之但惆悵，故交茫茫戶南向。闈者如帝懶作磨，張腮挺腹形軀壯。冬陰何短歸路遙，獨君倒屣逾久要。出酒坐對燭花落，下階已白冰花高。燕關五十有一日，半在松間半君室。尋常減米移蚨錢，雨霰市中增炭值。臘之六日有晉遊，前一夕半猶我留。出卷索題并於畫，醉深捉

筆同乘舟。次晨馬上經君戶。呼君不出知君臥。蹀躞踏轉蘆溝西。胸中松與君交互。暮宿井陘脊。燕關月如玦。朝上晉陽樓。汾河水泱泱。三春青草不到塔。夏五燕子空飛來。土沙雜著橫梁粉。辛苦與雀爭虛仄。江南白苧吹新澣。今日披裘寒色滿。只看氣候甚參差。驚覺故鄉程更遠。所慰主人情殷勤。尊前時時說及君。囑君頻上慈仁閣。爲我遙望太行雲。

項聖謨一首

聖謨字孔彰。號易菴。又號胥山樵。秀水人。有朗雲堂集。

容臺別集。項孔彰畫。衆美畢臻。樹石屋宇。花卉人物。皆與宋人血戰。就中山水。又兼元人氣韻。雖其天骨自合。要亦功力深至。所謂士氣作家俱備。項子京有此文孫。不負好古賞鑒百年食報之勝事矣。

畫徵錄。胥山樵畫初學文衡山。後擢於宋。而取韻於元。其花草松竹木石尤精妙。

吳越所見書畫錄。王鴻緒云。項孔彰山水全師北宋。兼擅寫生。尤善畫松。故明時項松之名滿東南。

田按。孔彰畫長於仿古。余見其冊頁數事。山頭聳峭。怒濤飛立。得力於北宋大家。而別饒氣韻。可稱能手。

自詠松濤散仙圖

偃息松濤一散仙。葛巾挂壁自閒眠。窗前有竹聊醫俗。不到長安已十年。

墨緣彙觀。項聖謨松濤散仙圖自跋云。余髫年便喜弄柔翰。夜必篝燈著意描寫。昆蟲草木。翎毛花卉。無物不備。必至肖形而止。忽一夕。夢筆立如柱。直干雲霄。上有層級如梯。長可一二丈許。余登而據其毫巔。鼓掌談笑。嗣後師法古人。往往自得。自丙

寅六月畫成招隱圖後。此第二卷也。命曰松濤散仙圖。偶有自詠詩云。

蕭雲從一首

雲從字尺木。一字默思。太平人。貢生。移家金陵。晚稱鍾山老人。

池北偶談。蕭尺木以畫擅名江左。嘗作杜律細一卷。以爲杜律無拗體者。穿鑿可笑。而援據甚博。

圖繪寶鑑續纂。蕭尺木明經不仕。筆墨娛情。不宋不元。自成一格。

陳琰曠園雜志。胡瀛季守太平日。慕蕪湖蕭尺木能畫。三訪俱辭不見。胡怒。時新修采石磯太白樓成。遂於案牘中插入尺木名。攝之至。遂至樓中。令白壁間若圖成。卽當開釋。尺木年已七十餘。方臥病。不得已畫匡廬。峨眉。泰岱。衡嶽四大名山。凡七日而就。遂絕筆。至今登樓者歎賞不置。畫與斯樓俱傳矣。事與沈啓南絕相類。

畫徵錄。蕭尺木號無悶道人。善山水。不專宗法。自成一派。筆亦清快不俗。與孫逸齊名。兼長人物。生平所畫太平景離騷圖。好事者鏤板以傳。

郭麐鬢餘叢話。蕪湖蕭尺木居士以畫名一時。詩不多見。近得見其集。蓋谷音。晞髮之流也。詩多七言律。又每作必盡三十韻。纒放自喜。不拘聲律。以自抒其佻無聊之思而已。有惜娉詩三十首。序云。金陵小伎。避亂野處。秉禮自守。不輕從人。問其名。曰惜娉。或如杜詩不嫁惜娉。婷意歟。蓋寓言以自況也。如欲炙銀笙。嫌氣煖。爲挑蠟炬。戒心歛。幸未折殘江上柳。若爲卜築水邊村。長話祇因經亂後。避人偏覺此身多。月上莫依人弄笛。春殘不見鳥窺簾。等句可見。又有鍾山梅下詩。如海內有春藏北斗。雪中無路覓南枝。名花嶺上供千佛。野雪香中閱六朝。皆此意也。

郊居詩

隨意寒塘落釣鉤。青蛉作伴立竿頭。浮雲天際歸何處。獨樹溪邊影不留。蹈海魯曾連龍戰日。還家蘇武雁

聲秋。身經遷播皆萍梗。一有吾廬更有愁。

金遠一首

遠、字遐生。長興人。

吳興詩存。遐生性耽山水。種梅百樹。時吟其下。工畫能詩。自擬在淵明、和靖間。

浦上晚歸看雪

春來頻見六花飛。白屋家家盡掩扉。獨有野人幽興劇。夜深猶載滿船歸。

明詩紀事卷二十七下

辛籤

許友六首

友字有介。又名眉。字介壽。侯官人。有米友堂集。

錢謙益吾炙集。余在南京。爲牛腰詩卷所困。得許生詩。霍然自開。每逢佳處。把搔不已。

讀畫錄。有介畫如其詩。蒼楚有致。無一毫煙火氣。好畫小竹。做管仲姬。柔枝嫩葉。姿態穠生。自鑄許友畫竹章。每作竹卽用之。

因子累至京師。渡河而北。不復畫竹。忽放筆爲枯木寒鴉。蒼涼之態。不可把視。

十五國風高言集。田髯淵曰。有介諸作。有振衣千仞之概。有沿流九曲之情。淡如菊。清如竹。

漁洋詩話。楚人門巷瀟湘色。竟陵胡君信句。野航人遠雁聲低。侯官許有介句。

靜志居詩話。先生才兼三絕。名盛一時。其詩篇章字句。不屑蹈襲前人。正如俊鶻生駒。未可施以韉勒。

畫史彙傳。有介書畫喜臨摹米襄陽。構米友堂。辦香祀之。

晚泊瀛田

片棹以遲勝。風輕波復微。野煙依樹合。沙鳥貼江飛。人語孤鄉近。郊燈岸店稀。記程今夜始。一宿在漁磯。

送鄭一作客

明詩紀事 辛籤 卷二十七下

苔繡銀刀佩古囊。雞聲勒馬著衣裳。揮杯滿目皆朋友。亂世逢場卽故鄉。斷岸孤舟千里夢。曉天殘月萬家霜。悲予獨自看花後。春柳深深冷草堂。

畫郊行

乳鳩嗁午初醒夢。蛺蝶雙飛正弄晴。此地不因人世好。滿村花柳自清明。

春日園居

但得幽居草木安。小園數步較能寬。芭蕉葉下閒來往。一卷殘書斷續看。

讀書夜盡聞鐘聲從白月來

石樓隱向白雲封。知在岩嶠第幾重。殘夜讀書人未臥。萬山明月一聲鐘。

山居

落葉蕭蕭正掩門。山僧野客坐松根。水流花謝無人到。煙外板橋又一村。

魯得之一首

得之字孔孫。錢塘人。寓嘉興。有竹史。墨君題語。細香居集。

李日華墨君題語。孔孫天資高亮。神明沈鬱。居恆祛俗自恣。走入竹中。挹其颯爽之氣。興到一呼。墨君登案。疏瀉單複。無不盡意。

李肇亨墨君題語。孔孫竹枝。沈酣古法。時出靈心。不縱不隨。亦離亦合。心企手追。畢臻其妙。畫徵錄。孔孫善書工墨竹。發竿爽勁。掃葉清利。直由仲圭而追蹤文。蘇矣。李太僕日華稱爲翰墨中精猛之將。知言哉。晚年右臂不仁。以左手畫風竹。尤有致。

仿管仲姬竹

小蒸溪水晚風前。天聖曾瞻翰墨仙。剩有筆牀螺黛色。爲君重繪碧湘煙。

徐柏齡一首

柏齡字節之。嘉興人。崇禎庚午舉人。有勗光樓集。

構李詩繫節之。受知於黃石齋。石齋贈詩云。節之貽我詩。十章大清脫。洒筆睨古今。鐘鼎如鳩掇。放浪遺形骸。瞻眺留日月。不作悲離音。不著窮愁筆。不蹈辟支禪。不弄飛騰術。蕭然寄天地。風雨絡膠漆。甲申後往來閩。越間歸卒。

大雲菴舫閣

買得浮家不在江。竹梢分綠影漁艫。秋風颯颯三更後。月擁寒潮到紙窗。

朱奪一首

奪。故明宗室。諸生。世居南昌。國變後爲僧。號雪箇。曰人屋。曰驢屋。曰書年。曰瀘漢。最後號八大山人。

邵長蘅青門稿。八大山人明宗室。居南昌。遭變棄家。遜奉新山中爲僧。豎拂稱宗師。臨川令胡君聞其名。延之官舍。年餘。意忽

忽不自得發狂疾。忽大笑。忽痛哭。竟日裂浮屠服焚之。走還會城。倡伴市肆間。小兒隨觀譁笑。人莫識也。山人工書法。行楷學大令。魯公能自成家。狂草頗怪偉。亦喜畫水墨芭蕉。怪石花竹。及蘆雁汀鷺。儵然無畫家町畦。山人有詩數卷。祕不令人見。予見山人題畫及他題跋。皆古雅間雜以幽澀語。不盡可解。畫徵錄八大山人有仙才。隱於書畫。題跋多奇致。不甚解。書法有晉唐風格。畫擅山水花鳥竹木。筆情縱恣。不泥成法。而蒼勁圓粹。時有逸氣。所謂拙規矩於方圓。鄙精研於彩繪者也。襟懷浩落。慷慨嘯歌。世目以狂。及逢知己。十日五日盡其能。又何專也。

題畫

郭家皴法雲頭小。董老麻皮樹上多。想見時人解圖畫。一峯還寫宋山河。

汪珂玉二首

珂玉字玉水。徽州人。僑居嘉興崇禎中。官山東鹽運使判官。有鴛水月社篇。西山品。蠟屐音。

四庫總目汪珂玉珊瑚網法書題跋二十四卷。名畫題跋二十四卷。所載法書頗有目觀耳聞。據以著錄。不盡其所自藏。考據亦未盡精審。所載名畫。則宋元諸家銘心絕品。收錄極詳。贗素之富。誠爲罕有。靜志居詩話玉水不卑小官。留心著述。所輯珊瑚網一編。與吳下張青父品題並駕。惜乎詩草甚富。泯焉無存。

蘇小墓

無限春風無限情。千年猶想碧油輕。歌殘井畔桃花落。舞剩亭邊柳葉生。漠漠香魂疑月影。茫茫玉質斷雲橫。仙才仙色何曾死。不獨錢塘夢得成。

項氏所藏管仲姬竹卷。友人得之。已斷後跋。忽有得其題語者。爲中峯及松雪兩翁手蹟。時反疑爲贗作。爲賦一絕。

露葉煙梢幾幅攤。晴窗影落石泓殘。堪嗟書畫金湯失。一樣河山破後看。

張穆一首

穆字穆之。東莞人。有鐵橋道人稿。

遺民詩。鐵橋道人少奇挺。知劍術。壯歲來吳中。任俠自喜。結交皆名下士。兼工詩畫。吮毫潑墨。橫睨無前。其意欲有以自見。不得遂。歸隱羅浮以終。

元夜過魏和公旅邸。明發有瓊海之別。

睿言同意氣。離合便相關。良夜不重得。遊人難久閒。明燈寒共影。濁酒煖開顏。此地能長聚。菰蒲別世間。

來蕃三首

蕃字成夫。蕭山人。諸生有北沙集。

西河集。成夫貧空。敝衣縷裂。所儲圖史外。惟瓶盎十餘。實米鹽紵絮。每出行。書衣筆裘。手自抱持。至有挂兩肘纍纍。蔽以博袖。儼五石匏者。邂逅廣坐。端視緘默。值君者多。卜君語默以示臧否。至爲語云。言勿言。視來蕃。甲申以後。棄去舉業。專詩古文詞。始以博大自喜。既好爲瑰奇倜儻之語。既又力追先秦。崇尚奧衍。精六書。能作古文。魚籀大小篆。及隸入神。嘗作故明二畿賦。雄博頡鶯。抵轢前古。人以口踰厭讀之。惟虞山錢宗伯見之。稱曰。此馬季長之賦也。少游蕺山之門。蕺山曰。子袁夏甫也。吾初

以子爲狂。今知癡者也。

板蕩三首

板蕩崇禎末。遺賢尙有人。登朝常掣肘。抗疏敢危身。九廟精靈格。三邊涕淚新。時危不可掄。西北望煙塵。
伏枕蒼江上。貧家獨樹幽。巷留千里駕。客共百年憂。晚秫垂寒水。秋瓜蔓故邱。江山已殊異。徒傍望京樓。
野園秋水曲。村徑窶人情。黃菊開孤嶼。青山遶廢城。老宜驅犢往。貧擬賣魚生。尙識前朝事。垂紳際聖明。

明詩紀事卷二十八

辛籤

張綱孫十三首

綱孫一名丹字祖望錢塘人有秦亭詩集十二卷

四庫總目丹與陸圻柴紹炳陳廷會毛先舒丁澎吳百朋孫治沈謙虞黃吳相倡和稱西泠十子秦亭集晚年所刻原名從野堂集前有自敘一篇述其游歷所經而詩格與之俱變毛先舒稱其悲涼沈遠矯然不羣朱彝尊亦謂其五言古體波瀾老成南北行旅諸篇尤爲奇崛又嘗批其北歸詩云句句學杜句句不襲杜句句做句句不做其傾挹甚至故丹寄彝尊詩有慚我詩詞遺知己思君杖履定登臺之句今觀其全集其七言古體亦宕逸可誦不獨五言特諸體未能悉稱律詩尤不免率易今世說張祖望美鬢長尺餘手足胸背皆有毫寸許夏月好坦腹臥樹下視富貴若不介意性恬淡不樂交遊好爲詩古文詞喜山水深溪邃谷不避險阻每得意長嘯忘返毛稚黃言祖望詩蒼澀頓挫如大漠風莽莽無極

西陵十子詩選祖望骨格蒼勁雖其源出於杜陵而法能獨運語有利鈍無妨老境

靜志居詩話秦亭詩方之西陵諸子逸倫絕羣

詩觀二集祖望北游五言古可頡頏少陵入蜀諸作

田按祖望早年入西陵十子社望其詩無甚殊絕晚乃蒼渾雄肆人固不可無年

坐安隱寺

箕坐青苔石。虛谷聽未了。法堂隱竹暮。古殿敞松曉。澗深生溟雲。藤垂怯隱鳥。回顧白石潭。傍映蘿月小。
贈孫宇台

琉璃河

仲冬嚴氣寒。堅冰白似骨。策馬琉璃河。橋滑不可越。從者挽纜繩。兩足尙椽杙。前人戒後徒。那知墮倏忽。
闌干有鐵棹。半插沙水窟。云昔王將軍。勇氣殊不沒。死難梁晉時。慨慕將鬢捋。

廢園郎季千沈去矜夜坐

微月向荆扉。古樹流螢白。涼風吹懷抱。雜坐感今夕。惜哉芳樹園。零落生薇蕨。海燕始去帷。寒蛸早居壁。
歌梁想餘音。舞臺誠遺迹。旣成黜黜徑。復象萑葦澤。幸藉二三友。秉燭讌良席。何以慰所思。清言庶悅懌。

山居

人生苦不足。趨利無窮年。孰是能居貧。而終寡所牽。入山不必深。且耕南村田。解衣桑樹下。負薪古墓間。
古墓多白骨。蕭蕭生寒煙。及時當行遊。恐爲樵牧憐。

贈恆貫上人

尋師萬里外。隨宿古招提。天盡條枝北。河流大夏西。秦關看雁去。蜀道苦猿啼。應覽名都勝。津梁路不迷。

秋雨

棟雲迷昨夜。簾雨暗來朝。門接黃溪水。樓聽白塔潮。花鷗形泛泛。魚虎羽翹翹。閒問投罟者。前村縱木橈。

湖上

湖山聊自放。天地一高歌。草色秦亭合。松聲伍廟多。微風低白鷺。陰雨叫蒼鵝。欲溯中流去。愁心奈若何。

鞏華城雪望

秣馬荒城暮。霏霏雪滿天。寒雲垂大地。春色散長邊。赤豹藏妖窟。黃熊走獵煙。客心終不遂。頭白此山川。

度泗水

泗水流波闊。千年齊魯間。大魚噴沫起。老馬鬪風還。落日依蕭縣。孤雲出碭山。始皇求鼎處。寂寞一沙灣。

蚤過沿山

已背沿山縣。龍門此界開。高帆帖嶺度。奔溜射潭迴。古壁攢風穴。晴雲洗石臺。幾翻歌嘯起。穩坐興悠哉。

過小孤山

山勢插江出。中流斗壁迴。潮分彭澤大。石裂馬當開。鬼斧龍宮削。神雲鶴觀來。小姑不可見。愁絕望妝臺。

積雨

積雨西湖後。開簾望遠汀。輕舟依獨樹。細草上荒亭。鶴鶴晚風足。魚蝦春水腥。那知蓬戶外。山色盡冥冥。

沈謙十三首

謙字去矜。仁和人。有東江集。

今世說去矜少穎慧。六歲能辨四聲。長益篤學。嘗自言。著作須手定自刻。庶保垂遠。若以俟子孫。恐故紙斤不足當二分直也。僻處杭之東偏。聲名藉藉。吳越齊楚之士。過鼓村。車轍恆滿。

西陵十子詩選。柴虎臣曰。去矜詩如秦川佚女。巧弄機杼。心手既調。花鳥欲活。聆其啞軋之聲。皆中矩度。又加金簧初炙。脆而不裂。

靜志居詩話。西陵十子。多以格調自高。去矜兼采組於六朝。故特溫麗。田按。去矜樂府。安雅中節。五律高朗。七律雄麗。洵是才人之雋。

引聲歌

外極莽蒼。內保精粹。至人不言。四時咸備。理不出身。道不在智。形體塊然。神明所寄。虛心實腹。抱道守真。大化迴薄。與仙者鄰。運斡圓象。敷而廣輪。陰陽不害。庶得平均。

秋閨曲

寂寂璇閨暮。迢迢玉塞秋。紫苔生古砌。華月映空樓。寄書北雁少。臨鏡翠蛾愁。戍火遠猶見。寒衣擣未休。掩巾時裏淚。挾瑟憶纏頭。畏聞銀漢裏。早晚會牽牛。

行路難

美人遙夜開金堂。輕軀緩步搖明璫。含情凝睇如不樂。博山火冷銷都梁。紈扇團團象明月。羅衣肅肅愁巖霜。人非一身誰不別。攬此盛年情莫當。不見芙蓉猶並蒂。下有比翼雙鴛鴦。

晚眺

川原望不極。孤客自登臺。落日大荒遠。平沙秋雨來。青門生事渺。白石壯心哀。歸思西風後。空憐作賦才。

新霽

曉起積陰散。荒原極望時。雲晴芳草合。日上大江遲。世事獨不見。天涯有所思。山中媿高臥。得有外人知。

人日卽事

去國又人日。風光殊可憐。江鴻迴凍雪。沙竹淡春煙。世事交遊淺。鄉關戰伐偏。病餘聊騁望。無那惜華年。

震澤眺望

湖光千頃對斜曛。隱見三洲望裏紛。朔氣自蒸天目雨。秋風不散洞庭雲。橫琴坐嘯龍應下。岸幘驚看酒半醺。何日扁舟沙草外。可知鷗鷺是吾羣。

同柴虎臣張祖望毛馳黃景明登張氏樓晚眺

張氏樓高暮色深。諸公閒日暫登臨。沙邊雁落依春渚。雨外龍歸帶夕陰。湖海漫窮千里目。干戈難寄百

年心坐中誰是多愁客。苦對東風作楚吟。

九日言懷

九月九日意不愜。杖藜扶病登高臺。盈樽綠酒此時醉。舊國黃花何處開。金管玉簫激霜霰。銅駝鐵鳳生莓苔。望鄉不見遠天盡。蕭瑟江山歸去來。

旅夜

旅館淒淒清夜徂。半生流落愧妻孥。可憐戰伐多新鬼。何處乾坤著腐儒。砧杵萬家明月苦。旌旗千嶂野雲孤。帛書漫託南雲逝。未信衡陽雁有無。

久客

久客西陵道。蕭條愁殺人。梅花昨夜發。山縣又逢春。

復愁

遣愁一何難。復愁一何遽。湘水杜若開。欲采不得去。

遇俠者

將市百金劍。笑脫千金裘。相逢無一語。攜手上青樓。

柴紹炳四首

紹炳、字虎臣、仁和人。諸生。有青鳳軒集。

毛際可西陵五君子傳。虎臣博聞強記。下筆輒數千言。華亭陳子龍負重名。爲序其青鳳軒集以傳。曰東南奇士也。性純孝。聞父卒於官。號咷欲絕。見者隕涕。里中兒以父咎出亡。虎臣向之流涕曰。僕雖欲如受父小杖。詎可得哉。作遊子遇孤兒行示之。其人感悔自責。

張清原蓉湖文集。康熙己酉。詔舉山林隱逸之士。范中丞以先生應。時已老病。力辭乃已。又謂刻其所著書。則曰。身隱焉文。范嘆息而止。

西陵十子詩選。毛馳黃曰。虎臣詩如連雲夏屋。亡論榱棟堅壯。卽枿稅榑。都無細材。

田按。虎臣以行誼重。小詩卻自綺麗。

喜陸大景宣歸河渚

征塗幾歲竭歸來。庾信江南重可哀。春雨草連村市沒。曉風花傍戰場開。我思賣藥仍無地。君定垂綸何處臺。總是他鄉成浪迹。故人相見且銜杯。

沈去矜見懷率爾奉酬

舊國離人賦轉工。幾輕搖落向秋風。何堪芳草王孫綠。自惜名花簡子紅。去矜近習鑿。簡子藥草也。吳越江頭方逐鹿。臨平湖上有冥鴻。於今每發相尋夢。定在蒹葭白露中。

江南絕句

春來百種花。百花百樣香。癡小如花女。百樣可憐妝。

哭覺上人即江子道閣號夢破

彩筆豪吟四十春。誰知布衲老風塵。江南花草渾閒夢。不道文通是恨人。

孫治二首

治字字台。仁和人。諸生。

西陵十子詩選。毛馳黃曰。字台筆墨清拔。澹而不疏。去初唐最近。故五言佳境。能挹武德之夷澹。兼垂拱之凝整。靜志居詩話。字台刻意摹古。甯質不佻。

清溪

徙倚清溪側。徘徊高柳間。鳥飛仍帖水。雲吐復歸山。野客荷鋤立。漁人擊楫還。狂歌出塵表。興盡掩柴關。

酬去矜十六韻

諸賢盛越絕。才子本吳興。大雅於斯振。風流夙所稱。賦成梁苑雪。詩詠玉壺冰。上客從鉛槧。佳人擁髭髥。雄辭奪鮑照。宮體駕徐陵。警枕盤龍錯。玄亭白鳳升。中原孰長弟。下走豈曹滕。似子才無敵。翛然帶不勝。關河愁極望。風雨夢相仍。菊戀陶彭澤。鱸思張季鷹。九歌虞太乙。雙樹問高僧。野徑尋芳草。扁舟賦采菱。崩緱唯一劍。孤館對殘燈。白玉誰為剖。青雲自可凌。賈生哀鵬鳥。莊叟說飛鵬。都是煙霞侶。幽棲共百層。

朱鶴齡四首

鶴齡字長孺吳江人諸生有愚菴小集十五卷

四庫總目鶴齡始專力於詞賦自顧炎武勛以本原之學始研思經義於漢唐注疏皆能爬梳抉摘獨出心裁故所作之章亦悉能典雅醇寔不蹈剽竊摹擬之習其邨鄘衛三國禹貢三江震澤太湖嶧冢漢源諸辨多有裨於考證嘗箋注杜甫李商隱詩集故所作韻語頗出入二家之間而寄興清遠能不自掩其神韻與錢謙益爲同郡初亦以其詞場宿老頗與倡酬既而見其首鼠兩端居心反覆薄其爲人遂與之絕所作元裕之集後一篇稱裕之舉金進士歷官左司員外郎及金亡不仕隱居秀容詩文無一語指斥者裕之於元旣足踐其土口茹其毛卽無反詈之理非獨免咎亦誼當然乃今之訕辭詆語曾不少避若欲掩其失身之事以誑國人者非徒悖也其愚亦甚云云蓋隱指謙益輩而發尤可謂能知大義者矣

春望

草色亂青縞春歸綺陌斜野煙生不斷古樹禿還花白鳥依漁艇青山帶酒家杖藜風日好憑底答韶華

過周安期山中故居

霜葉重重合翠微石苔行迹尙依稀身逃谷口名仍在賦就甘泉世已非書帶漫隨寒燒盡薜帷俄逐水雲飛白蓮耆舊多凋謝更與何人共釣磯

柳枝詞

十里紅亭嫋嫋春。任他輕拂陌頭塵。如今世路輕離別。誰倩長條縮去人。

秦淮花燭詩爲江右蕭孟昉作

合歡雲錦爛花蹊。月扇銀燈隊隊齊。今夕蘭房佳氣滿。催晨不用汝南雞。

顧夢游五首

夢游字與治江甯人。副使瓌曾孫。崇禎壬午歲貢生。有綠茂軒詩集八卷。

四庫總目。夢游與葛一龍。邢昉諸人相倡和。詩格皆近中晚。施閏章序稱昉詩學勝才。夢游詩才勝學。亦二人之定評也。有學集。與治筆墨妍雅。晚年屢陷坎坷。無子。窮老以死。施愚山經紀其喪。又屬其友方爾止網羅放失舊稿。手自排纂。刻而傳之。

今世說。姜子翥被難繫獄。與治力營救不能出。除夕。遣甥梁爾礪同囚守歲。久始得雪。莆田宋比玉與與治善。比玉沒。與治走閩哭。伐石表墓。南州蘇武子工古文。歿。與治鐫板行世。武子以有聞。北平于司直好奇。結客遊秦淮。死。無恤者。與治含殮理喪。又板其文傳。司直石阡費考功。筆山罷官。貧。分宅居之。歿。葬顧氏塋旁。始筆山令福清。稿佚。遠求得之行世。又周旋釋剩公難。幾株。及剩公寂。蒐其遼左雜詠存之。其高致類此。

愚山集。曹公學。佺選十二代詩。士爭附以立名。夢游獨屬故舊遺草。而不及已詩。曹強發其笥。得一帙。刻之。曰。真詩也。善行皆書。如靜女高士。閒逸可喜。

周亮工賴古堂集。與治詩。清真絕俗。別成一家。讀者望而爲高人介士之詩也。

田按與治任俠有東漢人風好刻故人遺集其卒也愚山爲之刻集施報不爽豈不信哉

歲暮寄慧公

寒山無客到破寺有僧存數折入松徑一籬開竹門耕牛閒旱土野雀噪飢村託鉢應空返霜天煮蕨根

送邢孟貞還石臼

月當分手夜分外冷高秋蟲響坐來歇林風相與幽到家收晚稻攜子上湖舟莫戀衡門好遲君上酒樓

徐昭法山房同姜如須楊明遠賦

未免塵中去其如惜別真得朋能愈疾留客不知貧天地存諸子兼葭老此人相逢惟痛飲往事莫沾巾

吳門別友二首

未是還家客船開亦當歸可憐衰柳路猶作斷蓬飛勝地宜遊屐良朋待款扉霜天扶病去山水兩依依臨發更移寓多時住半塘清秋閒竹杖白日臥藤床茶費老僧供餐分高士糧累人非一事方晤久空囊

董說十三首

說字若雨烏程人詩人遐周子崇禎諸生晚爲僧名南潛字寶雲有人間可哀采杉落葉西臺病孔雀紅蕉登峯臨蘭亭雒陽洞庭雨鬪韻牌畫石西荒洗藥積雨夕香挂瓢拂煙等集

董氏詩粹豐草菴集十一編篇體驚奇後依靈巖繼起和尚弘儲出家詩亦脫落凡近變奇麗爲清峻

靜志居詩話。若雨腹筭便便。未免有才多之恨。至其硬語澀體。絕不猶人。方諸涪翁不足。比於饒德操有餘。
田按。若雨遜迹空門。未黜綺語。觀其自序云。我不能如世之詩。珠聯漢魏。璧合三唐也。又不能如世之詩。鬼言無蒂。沈墮秋煙也。耽情於方外。合社於漁樵。遊夢於山經。孤癖於香法。可以得其意境矣。

諸葛菜

玉壘愁雲鵲血紫。花落幾迴桐鳳死。惠陵草沒石麒麟。昭烈陵名惠陵九陣圖空咽江水。蕪菁一握雁門秋。葛山打鼓祠武侯。

西田謠壽王太常煙客

西田老人雙頰朱。西田秀野天下無。為督西田看雲約。十年不寄西田圖。花連鹿柴辛夷香。輞川流傳圖卷長。古今相望詩畫絕。輞川整暇西田荒。山水由來貴荒逸。高人雅會從真率。西園對話挂西窗。霜葉聲中看點筆。

漫興

衣借空階葉葉縫。杜鵑國裏買孤筇。未能逸俗朝評帖。一事如僧夜打鐘。眼底三千年舊蹟。夢中七十二
青峯。人間難著支離叟。只合天台對古松。

客有和竟字斜韻詩余用其韻

醉漁曬網豎竿斜。鳧鴨聲中暫寄家。秋晚每租鄰舍艇。日斜去看別村花。沙瓶未賣留燒筍。樵笠新縫備採茶。碎石種成蒲九節。好題齋榜作青霞。

感懷

茅屋三間亂篠灘。繡苔石落燕泥乾。蠶眠初起桑園鬧。茶價新高瓦鼎寒。樵艇許分叉畫杖。竹籊喚揀釣魚竿。摘來姊妹花偏豔。白髮愁看獨倚闌。

菴居雜事

僮約新頒種樹科。擬鐫花歷石新磨。空堂鍊墨搗茶臼。細雨借書披釣蓑。書帶乍驚啣藻燕。卦錢移買放生螺。竹枝拗作池邊柵。爲怕兒童摘早荷。

書屋初成

九曲籬成自往還。亂藤遮屋不須刪。愁來草閣四窗雨。夢裏江南萬疊山。買艇劣容琴鶴共。種松兼辦子孫閒。一丸泥斷東偏路。只遣清風夜扣關。

住靈巖峯頂

家在松陵西復西。樵船春放鷓鴣溪。更生昔日元名向。中散先人舊姓奚。峯繞石樓遊是夢。眼空雲海物真齊。藥爐茗椀生涯冷。又盡禪房一甕齋。

舟居遙和石樹上人

一任人猜米老舟。莫教藤杖閣船頭。筆從白鷺飛時點。畫向青山影裏收。小住不嫌尋釣侶。移家明日換蘋洲。臥遊寂寂終輸與。落葉吟寒客未酬。

咏香煙

秦樓曲斷夜偏長。愁殺寒衣空自香。最是篆煙知妾恨。盤旋畫出九迴腸。

題昭君圖

天寒抱馬出邊頭。袖拂胡霜雲正愁。空有幽魂託明月。年年長照漢宮秋。

西村雨來

大幅東絹著水墨。雨在陽山箭缺西。陣雲未到桔槔卸。冷綠一堆雛鳥噓。

糊窗

幅幅凝霜照格裁。樵堂飛不到塵埃。白雲莫訝苦相拒。清曉看山我自開。

魏學洵四首

學洵字子敬。嘉善人。贈太常卿大中子。鄉人私謚孝烈先生。有茆簷集八卷。

四庫總目。學洵。給事中大中長子。大中忤關被逮。學洵微服變姓名。匿定興鹿善繼家。萬計營救不得。柩歸之後。竟以毀卒。世

稱忠臣孝子萃於一門。然學泚尙有老母而爲無益之死。或頗疑其過中。今觀集中與潘茂莊書曰。追比方始。泚將就浙獄矣。又辭里中父老書曰。目今公差來捉。且夕將死。家門傾覆。無復可言。然則大中沒後。所謂坐受楊鎬。熊廷弼賄三千三百兩者。所司仍追呼於家。學泚積憂積瘁於前。積痛於後。又重以閹黨之威虐。數者交迫。乃無生理。非真以一冥不視。蹈滅性之戒。故學泚之孝。在於大中被禍之日。竭力殫心。蹈危履險。出萬死以冀一生。今誦其與人諸書。至性惻怛。足以感天地而動鬼神。而錢士升等作序。惟欲以隕身殉父稱之。遂諱其追逮之事。淺之乎知學泚矣。

靜志居詩話。魏忠節公被逮日。天大雷電。子敬獨跣號請隨行。公語之曰。覆巢豈有完卵。父子並死無益也。子敬乃微服緹騎後探起居。抵國門。邏卒四布。乃變姓名匿都市。營救不可得。公既弊獄。扶柩歸。朝夕躡踊。未嘗一入寢室。淚盡唇焦。家人捧水漿以進。卻之曰。吾父詔獄中。孰夜半而進之漿者。病且革。進以藥。則又卻之曰。吾父詔獄中。孰診視而進之藥者。歷數旬而哀毀死矣。思陵卽阼。朝士上聞於朝。以是海內稱爲孝子。大學士同里錢公士升序其集云。子敬之志。父存則不獨死。父死則不獨生。是誠孝子之知己矣。常甲子秋。忠節掌吏垣。以激濁揚清爲己任。天下仰望太平。子敬獨私憂之。歎曰。無根之草。其能久乎。物不可以終通。天始蘊隆。正人之毒而速之惑也。未莽而禍作。人服其識。

樵李詩繫。子敬詩近古淡一派。時而詭異。又似錦囊中物。錢性魏塘詩陳。子敬有至性。八歲就外傳。墮橋折足瀕死。不作呻吟聲。猶臥吟陶詩。以慰親意。弱冠才氣風發。詩文落紙爲名流所推。

龐德公

龐翁襄陽人。不識襄陽縣。躬耕有餘暇。支頤玩時變。鹿門漾春風。吹落桃花片。區區一角天。兒輩已足辦。

茅檐雜詩二首

獨坐不知夕。時聞棲鳥鳴。閒情懷應物。淡語憶淵明。近借鄰家棹。前移柳下罾。道逢田父返。相話荳花棚。孰謂貧多暇。箋詩更解玄。業隨當代後。癡到古人前。瓶滿陶潛粟。囊餘杜甫錢。願奢誰過此。老我只丹鉛。

秋興

一夕西風到畫欄。芙蓉消瘦不禁寒。身無同調人應笑。坐有新詩眼倦看。逐伴未能忘袒裼。閉門聊自愛衣冠。晚來斗酒長吟處。月下天高白露溥。

湯傳楹四首

傳楹字子輔。更字卿謀。吳人。諸生有湘中草六卷。

田按。卿謀早擅才華。詩多綺語。亦有雋語。惜年僅二十五而夭。未見其止。

臥雨有懷次展成韻

遠漏沈於夢。溼螢墜不流。氣涼初著枕。光澹即生秋。竹雨彈虛壁。溪雲照小樓。客心無可寐。清思上簾鉤。

曉望

光景雜然出。因知人境閒。初煙濛獨樹。宿雨互前山。搔首愁無際。吟魂澹不還。江南清曉處。幾疊畫屏間。

荒寺

蕭條畫堵閉寒塘。寺額模糊失漢唐。廡曲山魃時弔月。歲凶野老不焚香。蒿萊蔓引談經坐。烏鼠縱橫選

佛場金梵已隨煙火盡。一僧捫蝨立斜陽。

新婚

日影和煙上畫廊。雙鬟悄立整羅裳。傳來絮語欺鸚鵡。睡足脂痕暈海棠。扣領含羞留待束。舉帷匿笑不成粧。守宮的的爭衾豔。未許人前理繡床。

繆永謀十二首

永謀字天自。更名泳。字于野。又字潛初。亦曰一潛。嘉興人。諸生。有苻谿集。

靜志居詩話。天自韶年深懲公安。景陵流派。一以蕭統。徐陵所選及左克明。郭茂倩之書。規模傳習。及周覽四方。風氣雖殊。終不改度。可謂有君子之守者。

梅里詩輯。天自詩。寓感慨於和平。寄高華於激壯。風格與雲間陳臥子相近。

田按。天自諸體俱工。七絕尤有丰韻。

築隄謠

朝築隄。暮築隄。築隄何辛苦。天雨三月。漂我田廬什四五。縣官徵役夫。役夫無家室。但宿隄下土。朝行荷鍤。暮行乞食。乞食路傍人。飢來不得力。前年築隄隄未立。今年塞河河更急。洪園竹木下已盡。柳條無枝。伐不息。明年隄成多種樹。爲作官家騎馬路。

芳樹

芳樹不知名。婆娑樹下行。應憐美人意。爲傍玉階生。綺戶春風滿。高樓日暮情。年華猶未晚。搖落使心驚。
擬古詩

盛年不再得。志氣無窮期。今日不爲樂。來日安可知。爲樂將奈何。去日常苦多。中流載簫鼓。一醉朱顏酡。
僊人如不死。何不來相過。

金陵篇奉寄外舅王翁

四坐皆清聽。聽我歌金陵。金陵天府國。都邑自相承。龍盤虎踞雄。江左畫閣連。雲接青瑣。重門大道七。香車桂檝。蘭窗九微火。渡江名族舊繁華。共羨王家勝謝家。十二珠樓萬年樹。三千繡戶滿庭花。當年尙憶曾遊處。幾歲移家洞庭去。今年復事金陵遊。南鄰北里相淹留。秋風不識烏衣巷。明月斜臨白鷺洲。雄心慷慨應如昨。擊筑高歌重然諾。囊中不惜沽酒錢。天涯且就金陵約。平生自媿郗公親。吳苑棲遲三十春。窮途意氣無所惜。寸心感激誰能陳。卽今搖落江村暮。舊恩遠憶金陵樹。一望金陵思渺然。石頭城北五湖邊。何時滿酌金陵酒。更醉高堂紅燭前。

上巳前一日遊支硎山

地迴羣山接。支硎入望來。昔人今不見。遺迹自荒苔。曲水迴香閣。長松拂講臺。更貪風日美。花下早流杯。

諸將

大將仍兼五等崇。橫戈躍馬舊稱雄。風塵關塞三千里。倚仗安危六七公。西楚包茅今不貢。東方杼柚久
應空。山河帶礪虛盟誓。麟閣何人第一功。

越中感懷

會稽南幸越王宮。舊國山川尙禹功。千里旌旗橫海上。一時豪傑數江東。龍沙日下荒城閉。雉尾雲移玉
殿空。遙想巡遊多歲月。樓船寂寞起秋風。

鴛鴦湖

南浦秋風長綠蘋。湖光一色淨無塵。鴛鴦驚入荷花去。唱徹菱歌不見人。

傾脂湖

紅粉青娥夜洗妝。顰脂落盡御溝香。于今流水空宮裏。猶送飛花出苑牆。

見月

北風吹後海雲寒。城上棲烏繞樹難。今夜關山有明月。一時秋思滿長安。

春思

樓前楊柳數行斜。樓上美人愁落花。燕子不知春已暮。銜花將去入誰家。

登舟

石城春色過江灘。七里洲前夜未闌。一笑登舟望明月。回頭不見小長干。

胡山十一首

山初名日新。字天岫。宜興人。諸生。僑居海鹽。徙嘉興。有葑汀、寓廬、東武諸稿。

梅里詩輯。葑汀詩。超邁清空。激昂蕭瑟。五律尤勝。

田按。天岫賣藥梅里。隱處市闌。古詩雄快。煙雨樓一篇。聲情綿邈。有猿吟鶴唳之音。五律亦自清婉。

秦山懷古

秦皇奮咸陽。六合縱虎視。雄若萬馬馳。羣英直犬豕。滄海何足夷。猛氣壓倫比。嵯峨海上山。蠱峙波濤裏。左輦宮中人。前驅挾飛矢。東望卻蓬萊。西顧渺弱水。白雲自去來。仙草紛若芷。徐福招未歸。沙邱腐天子。

古詩

長生希大藥。入山炊丹霞。呼吸龍與虎。黃金化泥沙。服之壽天地。顏色如舜華。燭火易以滅。遠行易以歇。上士澹無爲。珠光抱明月。

咏懷二首

雲從西山來。宿我崖下屋。高松夾修篁。絕壁瀉飛瀑。抱膝謠鳳凰。清音激空谷。抗手招仙人。雲中下白鹿。秦王尚狙詐。策士紛關東。時無龍虎士。遂令雞狗雄。朝橫暮復縱。嬉戲如兒童。淳酒死信陵。六國生蒿蓬。

萬古一片月。清光流絲桐。

烟雨樓

烟雨樓頭夕照多。烟雨樓空可奈何。烟消雨歇樓何處。只有鴛鴦泛碧波。鴛鴦湖水波千尺。鴛鴦湖上曾相識。綺羅城郭錦江山。桃李容華玉顏色。惟將歌舞送東風。若個妖嬈冠南國。憶昨承平隆萬年。滄海無波弓絕絃。奇琛四出中貂使。仙鹿時騰幕府牋。十里澎湖通笠澤。幾灣語水下由拳。裴住宅畔舉芳芷。陸贄橋南鬪采蓮。水上軒窗微隔雨。波心欄楯巧疏烟。太守便爲游狎長。豪家不惜粉脂錢。當湖公子藏輕俠。不逞探丸聚肘篋。風角妖人指異星。重瞳秀士驕長鬣。盡道封侯骨相成。那知滅族門誅涉。酒後狂圖隱語書。幾乎血濺南湖楫。春草春花春復秋。湖上女兒紅黛愁。金陵薛五茸城柳。洗盡臙脂此地遊。名士傾城爭一笑。詞人公讌滿高樓。聯吟共宿芙蓉艦。灑酒重臨杜若洲。片紙初題嗟妙手。千金立贈當纏頭。花枝不炤買臣墓。螺子偏迎范蠡舟。獨有賢豪負時彥。七省五侯交託徧。遙持啓事致山公。共羨人倫歸水鑑。白馬橫馱輦下金。黃蛇暗掣空中線。轉向回天咳唾間。翻雲覆雨須臾變。卿相趨朝盡過門。監司候宅稀留燕。當樓選勝闢名園。隔水開林起歌院。妖童姿首似鴉頭。小婢教歌皆粉面。舞衫歌扇滿房櫺。子弟梨園侍羞饌。畫橈齊放水中央。湖舫留賓百戲張。冠玉參軍低綠幘。明珠角伎賽紅妝。目成色授潛留佩。怨粉愁香悵隔牆。勢去朱門惟墜吻。邸封青岸有垂楊。孤兒亡命移名氏。橐葬歸魂送夕陽。乾坤龍戰

烽烟起。萬騎南征渡江水。俄頃降幡上石頭。忽見義旗橫橋李。詞臣珥筆說孫吳。省郎仗劍開營壘。鶴湖鵝湖同濟師。平江吳江各傳矢。可憐一夕響鳴笳。十萬義師血列豕。繡旗半折冷仙祠。雕戈虛插桃花里。烈燹高燒萬井空。雨散烟飛巨礮中。迴廊曲檻祇聚礫。畫棟重檐付祝融。當時倚閣人誰在。唯見荒臺月色同。

酬朱人遠

城樓高望極。萬騎蹴雲來。愁易驅人老。懷難逐凍開。庭梅看欲動。戍鼓聽仍哀。拌醉今宵酒。爐中火未灰。

月夜憶舍弟

萬里同明月。離人只獨看。故園烏鵲樹。吟望不知寒。坐使芳草滿。孰憐遊子單。夢魂頻見汝。努力勸加餐。

登山

野水兼天闊。浮雲共鳥飛。連峯七十二。何處是漁磯。深樹聞清磬。孤帆帶落暉。寒塘秋草外。不見一人歸。

暮春卽事

春暮過橫塘。風吹桃李香。明霞浮曲水。小艇下斜陽。樓上聞歌罷。罇頭索酒嘗。胡姬年十五。織手理新妝。

聞笛

夜半客欹枕。月明人倚樓。梅花吹數弄。野戍迴含愁。曲豔知紅袖。音淒易白頭。深閨有盧女。應自不禁秋。

得舍妹手書

寒流孤嶼外。夜雨一燈深。不寐渾無計。開書淚滿襟。浮雲江上意。游子故園心。戀戀真傷汝。淒然起越吟。

韓洽十首

洽字君望。長洲人。有寄菴詩存。

靜志居詩話。崇禎之際。言詩於吳下。吾必以君望為巨擘焉。匪特高節軼羣也。所撰彙學測解。釋訓考源。足證說文。長箋之誤。田按。君望詩。質慤而有真意。乃知高蹈之士。不尚浮藻。

言懷

梁鴻古高士。賃舂復牧羊。馬援大將才。田畜就邊鄙。管甯鋤菜畦。遺金曾不視。龐公隴畝間。釋耕對妻子。遐哉漢人風。去古似猶邇。不知澆訛俗。乃自何代始。或曰自晉朝。清談廢實理。勤恪謂俗人。虛無則名士。廉恥日益喪。爭奪日益起。于今千百年。斯風將何底。信矣王何罪。桀紂不足比。

雜詩

海水為平陸。泥沙困巨鯨。世無堯舜主。稷契老躬耕。嘆彼秋蓬弱。隨風萬里征。西施何必美。亡國乃傳名。

揖山樓

高樓三面青山立。山人愛山揖山入。一時相對忘主賓。佳樹佳花成翕集。青山斷處是湖光。風濤萬頃遙。

相望高帆白鳥互明沒。別作平臺對秋月。山人愛山兼愛文。壁間題詠紛煙雲。我來一揖不相拒。知余亦是青山侶。

岳墳

斧斤日出錢塘門。冢上松楸無復存。馬鬣荒涼蠲體泣。子孫飲恨徒聲吞。栖霞嶺畔南枝墓。犯者倉皇輒僵仆。健兒相戒莫敢窺。蒼翠森然獨如故。武穆英靈性自殊。嗟哉所見太區區。趙家社稷今安在。卻愛墳前樹數株。

題李龍眠諸夷職貢圖

有唐貞觀萬國甯。殊方異域皆來庭。立本爲圖擬王會。詭形怪狀流丹青。龍眠居士生有宋。未必諸蕃真入貢。得毋舊本重臨摹。左食貫胸聊玩弄。元豐天子承平日。君臣競講強兵術。不知中國正凋殘。馳想海邦兼日出。貢獒西旅四夷賓。作訓猶煩保傅臣。爲問伯時圖作貢。何如鄭俠繪流民。

贈冲上人

已悟三生幻。因于萬事慵。遙聞傳法處。空翠隔雲松。洗鉢緣清澗。開門揖遠峯。孤蹤自林壑。未許俗人逢。

箭關

一望秦餘頂。天然箭筈形。卻疑渾翠壁。誰與鑿青冥。帝力營雙闕。神功役五丁。憶曾盤鳥道。捫蘚立雲屏。

關山月

曉角數聲哀。邊風捲地來。十年征戍客。不上望鄉臺。

昭君

漢主何煩責畫師。畫師曾可定妍媸。深宮多少如花女。不嫁單于君不知。

野泊

溪上人家水鳥飛。桃花一簇近漁磯。長年打酒纜船去。獨坐篷窗看澣衣。

吳騏十首

騏字日千。松江華亭人。崇禎諸生。有願頌集。

靜志居詩話。日千力崇正始。其詩沈厚不佻。

明三十家詩選。日千幼有神童之目。讀書過目成誦。以詩文受知於陳忠裕。夏忠節兩公。父遇兵。傷左臂創甚。杜門奉侍。明亡。絕意進取。自號九峯遺黎。康熙中。同里某分修明史。日千貽之書。略曰。知執事撰先朝景帝本紀。景帝功在社稷。當時實錄。取媚英廟。極其訾謗。夫景帝雖藩支。然以高帝視之。此安我宗廟者也。仰維濬發幽光。不勝翹企。又先達張慎齋名祚。以待御外。轉廣西僉憲。佐韓襄毅轉餉。盡瘁。襄毅果於殺戮。而慎齋多方營解。全活甚衆。今縱不得立傳。或於襄毅傳中略附數語。幸爲留意。督師袁崇煥坐叛逆受極刑。當時不知其說所從來。後讀范文肅公行狀。始知崇煥之死。乃文肅之反間也。陳平之勳。已彰於六出。亞父之枉。宜白於九京。相國錢謙山以逆案一書成於其手。奸黨銜之刺骨。坐與崇煥同叛。擬大辟。思陵云。謂龍錫

爲叛必不其然。思陵之明不可沒也。其表揚潛德如此。願頌集詩於蒼涼古直之中。極沈鬱頓挫之致。蓋親炙大樽而不盡沿其派者。

田按日千詩音節抗亮。與陳黃門李舒章結社。厥後黃門殉國。舒章仕本朝。日千悼黃門詩云。寒食東風草樹稠。富林夙昔想同遊。銜杯晝永花臨戶。論易宵分月上樓。四海無人藏複壁。千秋遺恨託江流。生芻麥飯俱寥寂。落日荒原哭太邱。又書李舒章詩後云。胡笳曲就聲多怨。破鏡詩成意自慙。庾信文章真健筆。可憐江北望江南。可稱詩史。

烏棲曲

丹霞初散明蟾吐。採蘭歌發芙蓉浦。羅衣玉腕自操舟。那能相遇不同遊。

釣竿

濁水魚肥清水魚鮮。淺水釣易深水釣難。義不向濁水。古人曾有言。理我百丈絲。持我青琅玕。釣得潭中魚。停綸起長嘆。得魚誠本懷。釜魚心悲酸。縱爾江湖去。騰雲上九天。

戽水歌

東南風急大麥枯。秧田夜夜鳴蝮姑。鄰農相約共戽水。未及四鼓來喧呼。河港淺隘潮信小。待得天曉水已無。披衣躡屨急趨出。咿啞遠近聞轆轤。明星滿天爭唱歌。腳根騰踏忘勤劬。東方漸明日欲出。白榆樹上嘯慈烏。歸來饑倦汗濡縷。瓦壺麥粥甜如乳。埽場曬麥日欲午。旋割蘆芽餵童牯。本綿衣衫著不得。無錢買褐空嘆息。

輓呂驪仙母吳氏二首

早歲失君子。冰霜三十年。寒燈背風雨。塵土滿釵鈿。九廟今安在。餘生敢自憐。殷勤囑陶侃。努力向幽燕。社稷有今日。諸公將謂何。自慙弱女子。無力障狂波。窀穸歸何恨。衣冠事尚多。淮南四大帥。幾日渡黃河。

春感二首

自有東風動暮寒。更無遲日到欄干。震雷朔雪相兼至。岸柳江梅次第殘。慟哭虛傳河右表。謳吟猶望部南壇。山川風景今何似。獨上高樓極目看。漢皇陵寢鍾山上。珪璫年年事祝釐。永夜羣靈朝虎帳。有時陰晦見龍旗。青桐溜雨千章木。碧瓦含風百尺基。七載不窺松柏路。夢中瞻拜重淒其。

漢昭烈

名儒盧鄭久周旋。正值黃星受命年。蛇劍已移三統歷。蠶叢還闢半隅天。金甌付託耕莘佐。玉几彌留顧命篇。一代英雄生死際。銅臺遺令最堪憐。

寄懷金天石

故人落寞依江海。遠賦新詩慰寂寥。天下幾人能隱遯。漢家九鼎賴漁樵。煙疏檜柏停春雨。水黑蛟龍起暮潮。憶爾臨風空佇立。綠楊飛絮滿河橋。

題畫蘭

幽蘭雖芬芳。靈均自憔悴。三戶寂無人。託根在何地。

毛晉二首

晉初名鳳苞。字子晉。常熟人。

吳偉業梅村集。丁亥季秋。因訪楓林。扁舟過子晉齋頭。留宿汲古閣。牙籤萬軸。較勘精良。又多趙宋舊本。使人讀之。如桃源衣冠。非復今製。顧麟士同在坐。相與嘆息。以爲子晉嗜古篤學。結習編纂。雖歐公之於金石刻。王舜卿之於書畫。不是過也。

馮班鈍吟文稿。吾友毛君子晉多聞而好事。藏書數萬卷。詩人之至虞邑者。以隱湖爲歸。詩筒緘寄。遠屆蠻徼。車馬過從。文酒之讌。未嘗曠旬虛日。座間擘箋。長篇險韻。四應不疲。

陳瑚確菴集。子晉家隱湖之上。績學多聞。性好客。客至則翦韭烹葵。欣然命酌。出其藏書數萬。與客賞奇文。析疑義。倣古人月泉吟社。玉山草堂之遺風。酒酣耳熱。分韻賦詩。家有剞劂良匠。朝落紙而夕上版矣。

田按。子晉嘗輯明詩紀事。未見傳本。汲古閣刻書甚夥。此後如通志堂。士禮居。知不足齋。借月山房。守山閣。別下齋。皆聞風繼起者也。

十八日曉霽登塔

快雪交春燈。午夜光了了。登陟興方劇。未旦神光曉。竦身上浮屠。輕疾如飛鳥。插江碧玉城。一朵芙蓉小。

看梅和高季迪韻

一入香林便隔塵。峯頭升眺更撩人。波光嵐翠無餘地。冷韻孤標別有春。日煖若教開漸漸。風微那忍落頻頻。華光今日知誰繼。聊借題詩當寫真。

曾燦十一首

燦初名傳燦。字青藜。甯都人。有止山集六卷。

有學集。青藜詩。晤言十之。永嘆五之。其思則黍離麥秀也。其志則天問卜居也。

魏叔子集。止山爲人。愿樸沈摯。少負才華。以風流相尙。爲詩工美多豔。及遭世變。詩日趨於老樸。

詩觀初集。青藜躬耕讀書。襟期高邈。

田按。國初選家。王阮亭有感舊集。陳其年有篋行集。錢牧齋有吾炙集。葉訥菴有獨賞集。鄧孝威有詩觀。陳伯璣有詩慰。曾青藜有過日集。過日雖不及感舊。篋行之精。然搜採宏博。余此集勝朝逸民詩。實得之過日爲多。

長沙雜興

賦鵬憂賈生。懷沙沈屈子。古來放逐臣。傷心在湘水。我獨何爲者。崎嶇亦到此。朝看落葉飛。暮聽秋風起。離憂日日生。不知何所始。昔人曾有言。山水多窮士。

靈巖喜遇三輪上人

天地皆殘夢。江湖少故人。十年家國淚。萬死水雲身。三輪昔曾與楊藉草聊爲坐。看山可當鄰。還將瓢笠

意。辛苦問靈均。

同姜奉世舟次送春各成二律

綠樹千村暗。清谿一水長。孤舟從此去。十里卽橫塘。山鷓催寒雨。林鴉噪夕陽。與君歸秉燭。共坐惜春光。但覺花飛了。安知又送春。百年三萬日。四海一孤身。閱世憑憂患。全生愛賤貧。歲華流水去。催盡白頭人。

西竺寺苦雨

何代黃金寺。人來地覺偏。苔霑高礎溼。花委小池鮮。古屋生雲霧。春江走歲年。似從巴峽住。日日聽颺鶻。

將立春同李咸齋彭中叔散步眺望

羣動各有息。茲遊成我閒。草知深淺處。春到有無間。寒石自流水。夕陽多遠山。離離林下屋。時見鳥飛還。

恭謁金龍王廟

王姓謝名緒宋末以諸生死難誓曰黃河倒流卽吾報仇之日

下拜遺宮此布袍。觚稜斜日動旌旄。山川何事多新壘。舟楫依然轉舊漕。萬里魚龍南去盡。初秋星斗北來高。茫茫千尺黃河水。不見當年起怒濤。

送劉毅可歸江南

芳草萋萋已暮春。相逢喜在贛江濱。吾生只合烏鄉老。世事還同白髮新。烏路千山縈落照。鶯花三月送歸人。故交相見如相問。爲道曾生今更貧。

甲寅夏五雨中懷吳伯成明府

榴花初放綠陰齊。宿雨沈綿沒路蹊。溪水亂流城郭裏。雲峯時擁縣樓西。遙知愛客嘗投轄。每借看山一命題。幾度欲來尋舊侶。闔閭城上亂烏啼。

平山堂弔古二首

爽氣四來積翠寒。金陵千幃見龍蟠。君王只愛聽歌舞。碧水丹山不肯看。
荒堆古路散斜陽。見說宮人葬蜀岡。芳草不知春去久。西風猶帶綺羅香。

胡介七首

介、初名士登。字彥遠。錢塘人。諸生。有旅堂詩集。

梅村集。余遇詩人胡彥遠於長安。每酒酣詫客曰。吾家在武林之河渚。巒迴澗複。人迹罕至。煙汀霧樹。視之既盡。杳若萬里。彥遠自以居山久。一旦來京師。策秃尾驢。鄣便面。行泥淖中。鬱鬱不得意。發病思歸。他日有棄家變名橫山河渚之間。莫知其處者。其必彥遠也夫。

漁洋詩話。胡彥遠布衣食貧。而妻與女皆能詩。順治中遊京師。送人南歸云。帆檣楚國羣烏晚。橘柚吳天一雁晴。

靜志居詩話。彥遠與室人翁少君門內唱酬。晚逃于禪。年未五十而卒。其詩不屑效西陵派。謂吾盡吾意。免俗而可矣。

今世說。胡彥遠高自棲託。神理雋邁。嘗隱河渚。近止城北。芳樹池塘。環接戶外。諸駿男過談彌日。歸語人曰。嘗謂永興南穴。汲郡北山。緬邈不謂近咫尺。

田按。彥遠以詩遊長安貴人間。吳梅村有詩贈之云。雖入王侯門。不受公卿舉。萬年少贈詩云。河渚經營把釣綸。乾坤草莽一

閒身南陽高臥真名士。東漢餘生舊黨人。十載荃蘅同入夢。三冬冰雪獨傷神。荷鉏歸去田廬閉。莫向人間學問津。紀伯紫有贈彥遠南歸詩云。澹比松下禪。堅類柏舟婦。一家河渚棲。梅花帶左右。入林恐不密。數峯當戶守。內子亦苦吟。研山間井臼。置君神仙中。無迺圖畫醜。此語今十年。夢魂未嘗負。莫帶長安塵。輕點溪頭酒。皆有招隱之意。彥遠既歸。晚逃於禪。蓋已爲竹垞所許矣。故錄入此集。

感懷

庭鶴不自得。步影心悠悠。本是雲霄姿。馴人耳目求。餉我一握粟。令我失滄洲。斂翮發清嘯。寄聲謝同儔。清苦有餘樂。行矣毋自讐。

發邗上寄邱四宋丈兼傷萬年少之逝

二月下燕城。桃花春水明。新楊喧浴馬。廢苑寂啼鶯。郊外無軍壘。人間賴友生。存亡兼契闊。悲喜總傷情。

寄龔野遺

一葉落高木。草堂秋自生。故人已千里。明月欲三更。憂患存終古。饑寒見老成。霜清憐永夜。回首望燕城。

吳梅村被徵入都

幕府徵書日夜催。宮開謁石待君來。歸心更度桑乾水。仗櫪重登郭隗臺。花萼春迴新侍從。風雲氣隱舊蓬萊。暮年詩賦江關重。輸卻城南十里梅。

訪陸冰修不遇宿接濟寺明日題壁而去

鹿門人遠枉招尋。還宿谿南祇樹林。暫與僧間初定夜。自傷我負舊來心。長河日落魚龍晚。古殿燈昏風雨深。雞唱可憐衝曉去。參橫月沒一長吟。

建州酬龔中丞芝麓

薄遊戰地歸何晚。此日初還南建州。雨外孤帆傷久客。月中雙笛憶前遊。浮沈雅合金門隱。偃息偏逢鐵甕秋。傳得新詩盈瘴海。一時風雅盛曹劉。

康山謁忠臣廟

康山無恙太湖濱。廟貌忠臣廡食新。官渡夜濤驚隔代。老松古殿暗經春。支離天地常爲客。慘澹風雲各有人。躑躅荒庭銅狄恨。羣公應有淚霑巾。

邱世望十首

世望字當世。武陵人。諸生。有江籬館詩三卷。

沅湘耆舊集。龍太常稱當世詩。力挽波靡。根柢性靈。

田按。楚詩多爲竟陵所染。彌望榛棘刺目。當世詩特清俊。如亭亭新荷。不染污泥。

夏日池上作

幽居傍城僻。環宅美漣漪。高柳垂長條。深夏益離披。小屋跨池上。坐與清輝宜。涉境意已佳。稍深情轉怡。

息機遊渾沌。把卷搜神奇。隱几忽嗒然。此樂心獨知。彭澤千載遙。高風邈難期。吾亦慕寥廓。斯人良足師。
輓鍾伯敬

負才不在大。精詣乃成家。君詩貴清冷。往往棄春葩。叔寶妙玄言。惠施徒五車。仕宦豈不達。所悲生有涯。
千秋名士籍。展卷動咨嗟。

春初雨後看梅花

春煙散朝綠。石溜洗蒼苔。徑僻鳥逾寂。林疏梅正開。壓牆殘雪映。趁雨冷香來。恍泛瓊漿飲。何須更舉杯。

暮雨

暮雨一何急。殘花風更摧。病餘思斷酒。愁至轉銜杯。羽檄飛城郭。徵求罄草萊。那堪聞野哭。慘慘暗雲隈。

夏日德山

性與空山狎。來偏深夏宜。幽蹤尋壑遠。孤賞戀松遲。竹露晴猶滴。曇香靜自知。坐沈煙外磬。新月照來欹。

陳衡靈自欽海還攜酒過集

小隊衡門枉。芳尊海國移。故情添酒洽。老興發春遲。保障饒公等。江湖足鬢絲。不嫌疏簡慣。頻許細論詩。
得伯孔書聞將過大梁有寄

秋深彌憶子。搖落更何之。俗薄無交道。書來有夢思。閣雲寒自溼。江月晚相宜。欲問狂夫態。青編坐日遲。

送汪遺民南歸

執手河干客緒紛。綈袍霜冷恨離羣。天風吹下衡陽雁。鄉思先飛海國雲。入里詞人驚盛藻。過湖龍女乞靈文。桃花遲爾春來棹。預唱蘼蕪爲憶君。

九月八日

茅堂寂歷瑣秋陰。涼吹蕭蕭動夕林。綠酒偏於時節好。黃花難向雨中尋。登臺何客同明日。搔首高天且獨吟。世事驚心凋短髮。不教狂態費朋箴。

輓龍灑公先生

二十登壇四海聞。新都吳郡許空羣。方瞻帝幄咨元老。忽悼詞林失冠軍。暝入荒村棲定鳥。霜寒野水澹斜曛。平生一掬西州淚。灑向南天并作雲。

蔣之棻六首

之棻字天植。湘陰人。有江聲二集、四如小草。

沅江耆舊集。天植幼善屬文。有羅江才子之目。蔡江門先生尤重之。與同郡趙友沂、郭幼隗齊名。性豪邁。喜結納。與遊皆當世賢豪。處亂世。汲汲以澄清天下爲己任。甲申後。崎嶇戎馬。以勞卒於粵。

田按。天植詩。豪宕自喜。有拔劍悲歌之氣。

善哉行

去日莫論來日大難。憂心可藏。髮白難刪。解一河大多水。山大多雲。周王多道。列戟射君。解二柳季掩戶。釁出中堂。福來千里。禍起蕭牆。解三斗有美酒。盎有肥羊。君子豫悅。小人猖狂。解四黃鵠知春。鴻雁知秋。時過不返。水去難收。解五蜀犬吠日。吳牛喘月。少見多怪。嵇公眼白。解六食梅苦酸。衣葛苦寒。不可告人。徒傷肺肝。解七

懷王山長

記得尊前約。重門深數過。每逢落葉處。無奈斷腸何。山意隨松古。秋聲入雨多。衡陽雁迹杳。回首趁蒼波。

飲郭幼隗山莊

春水盈盈起綠蘋。一尊移話共南鄰。人間欲殺狂為累。世外相知貧是因。野叟密談分菽粟。素心閒伴數昏晨。銜杯張目看天地。判與連觴浹十旬。

送青原無可和尚

萬緣收拾上蒲團。春夢如今興半殘。清淨莫留文字障。頑空悔冒宰官餐。容僧便覺天恩大。出頂方知佛法寬。嶺表煙深難住錫。好攜明月到湘干。

江南行二首

江南年少酒家過。下馬傾尊索酒多。寶劍脫來隨意贈。揮鞭長嘯指天河。

江南女兒貌如花。手勻輕黛新月斜。千乘萬騎盡回首。不知心事託誰家。

韓純玉三首

純玉字子遠。歸安人。修撰敬子。有蘧廬詩集。

四庫總目。純玉父敬以黨附湯賓尹見擯於時。純玉以是抱憾終身。不求仕進。其行蹤略具所作蘧廬詩自序。及集中癸丑五
十生朝示兒詩中。

靜志居詩話。中吳韓君望。西吳韓子蘧。皆輯明一代之詩。君望曰。詩存。子蘧曰。詩兼。惜其書均未布通都。二子先後奄逝。其家
人故友。不復肯出。恐終歸覆醬而已。

田按。子蘧明詩兼序云。有明一代之詩。比美三唐。俯視宋元。洪永景運初開。犁眉遠邁。燕許海叟。追蹤少陵。高楊張徐。不讓王
楊盧駱。林藍曾許。可希王孟高岑。景泰流而爲纖麗。成化疏而爲清越。北地信陽。合七子以前。歷下婁東。合七子以後。踵事增
華。守而勿化。竟陵陶汰過當。而溺於幽涼。雲間欲還正始。而近乎郭廓。各殊其趣。各持其見。學者又各師其說。操一格以繩天
下。必欲人面如我面。強我樂爲子樂。語言歌歎。異口同聲。而始稱入彀。是則優孟衣冠。長存千古。新豐宮室。徧列九垓矣。他如
石倉濫登庸冗。莫辨淄澠。虞山廣肆譏評。偏揭曹鄒。一失之寬。一傷於伎。其爲病也。又與固執等。余博蒐約採。或繁或簡。或平
或奇。或莊或逸。或淡或濃。要皆各因其質。各達其情。各極其趣。而後愉快。從前諸家之褊心局識。悉舉而銷鎔之。子蘧之論如
此。惜不得其選本而覈之也。

過姚十四莊居

路從芳草入。門向遠山開。種樹交青靄。攜尊藉碧苔。河魚逆水上。海燕掠風回。更欲留深坐。重闌暮色催。

鄧尉山遇徐昭法卽別愴然有懷

吳趨間隔宿百里。離亂相兼十二年。此日弟兄仍一面。曩時師友半重泉。同依慧日爲禪侶。忽遣樵風送客還。無限斷魂收不盡。長松習習寺門前。

乙酉秋日同獻兒寓慧雲寺

先人題額依然在。彈指於今六十年。攜子重來我又老。逢僧暫住客如前。參天竹樹沿階長。滿地芟菰入饌鮮。圓澤不須頻問訊。三生好話舊因緣。

周箕九首

箕初名筠。字青士。別字管谷。嘉興人。有采山堂集二十四卷。

靜志居詩話。青士遭亂棄舉子業。受廩賣米。有括故家遺書連船鬻於市者。買得一船積樓下。每日交易。筐筥斗斛權衡堆滿。肆讀之糠粃中。其爲詩。句敦字琢。不輒襲前人片語。胸無柴棘。急人患難。視朋友如一身。人或忘大德而思小怨者。不以真諸懷也。晚年詩趨率易。好與浮屠道士遊。題詠極多。嘗醉書云。似士不游庠。似農曾讀書。似工不操作。似商謝奔趨。立言頗突兀。應事還簡疏。飢凍不少顧。吟詩作歡娛。可當一幅寫照也。

梅里詩輯。青士詩篇。清超樸淡。五言尤勝。

田按。青士與竹垞爲素交。竹垞表其墓。仿柳子厚獨孤申叔墓碣。書故友姓名於後者九人。王翊介人。范路遵甫。朱一是近修。王汾子明。沈進山子。李麟友。振公。朱彝鑒。千里。褚標霞。建。周篁林於。九人者皆能詩。以介人爲優。

秋夜懷李天穀

夜半落寒露。微風颯然起。湖光不知夜。秋明荻苗水。河漢繁星飛。一月靜如止。煙樹傷遠懷。伊人渺千里。

夜眺

中夜松徑黑。不知山月高。淒風動林木。萬竅皆怒號。宛如泛孤舟。危坐驚波濤。溼螢墮遠水。野鶴鳴寒皋。人生亦何常。哀樂隨所遭。長歌望河漢。何以解鬱陶。

渡漢塘

孤舟出新豐。初涉漢塘水。日落秋氣生。水曠寒煙起。返照漾菰蒲。微風蕩蘅芷。征帆去悠悠。我心渺何已。

宿揖山樓

偶爲寂寞遊。遂得高寒境。天浮長泖闊。雲落橫峯冷。出林鐘磬聲。繞檻星河影。弱喪未知歸。吾衰當猛省。

舟行

紫藤纏樹懸野香。清溪歷歷澄幽光。櫂聲初撥裂雲色。菱絲荇帶吹煙長。遠山微茫銜半影。溼嵐不落空濛冷。枯篷短楫憑空行。一葉虛浮去俄頃。高林飄沓雨滴衣。天驚石泣鳥不飛。櫻人突兀老松怒。山精窳宰相因依。寒陰初散孤蟾起。鄉園擁隔悲千里。驚湍汨沒魚龍哀。風吹露下如秋水。

西溪夜歸簡一潛

黃昏過虎溪。相逢石門西。風磬隔林斷。漁燈入浦迷。天空月皎皎。草白霜淒淒。不見巾車客。行歌空杖藜。

庚子春吳門陳漢公過五里追哭王山人翊時山人沒八年矣爲感

河流渡口渾。有客自吳門。言訪山陽舊。重過栗里村。琴臺春草合。隴樹夕陰昏。旅舍應無寐。何由感夢魂。

指月精舍夜坐有懷吳四讓木

落日精廬過客稀。涼風祇樹暝煙微。檐端星自雲中出。竹裏禽從水面歸。自愛清談揮麈尾。不妨狂醉解絺衣。牆東便是吳筠宅。欲刺扁舟夜叩扉。

送別

蒼江日落晚風清。送子南雲萬里征。待唱陽關舊時曲。河橋柳色不勝情。

魏允枏三首

允枏字交讓。嘉善人。忠節公大中孫。孝子學淨子。廕生。有維風集。

橋李詩繫。交讓甲申後高蹈不出。柳洲詩學之盛。奉爲主盟。

田按。忠節被逮過吳門。周忠介慰之舟中。以女許字其孫。卽交讓也。

吳仲珪墓下

咸淳之末宋事非。諸陵毀塌魂無依。玉匣珠襦啓幽寢。古人白骨將安歸。橡林處士有遺墓。自署沙門植

梅樹虛塚不像祁連山。殘碑尙立青松路。蹂躪曾無樵牧過。斧斤自遠匠石顧。閱歷滄桑三百年。慕君高節愛逃禪。已傳繪事冠當代。還將易數推先天。君臣大義委草莽。子孫中落無墓田。胥塘東繞菖蒲浦。丙舍荒涼屬誰主。桃李春飛寒食煙。梧桐秋落重陽雨。君不見六陵鬼哭蔓草生。此地猶存一抔土。

少年行

紫駟蹀躞玉鞭垂。半醉新豐日暮時。生長河湟人不識。獨身曾得射雕兒。

題法螺精舍

絕頂峯開祇樹林。翠微俯瞰碧沈沈。數聲清磬落山下。門外日斜春草深。

旻丹生四首

丹生、字形寶。一字山夫。嘉善人。

三閩識略。詩人旻山夫垂老落魄。往來吳越間。晚寓家楓橋。受知於錫山令吳公興祚。後以貧死。公時開府七閩。聞之惻然。遣人葬之寒山寺側。予偶過其居。題詩壁間云。老死寒山古寺東。詩人飄泊嘆途窮。故交萬里收遺骨。薄俗猶存挂劍風。

乙將軍歌題劉公餗所作傳後

乙將軍。真天人。烈如南霽雲。又如雷萬春。冒重圍。入孤城。出孤城。部領二百騎。出入風雨旋雷霆。誰能從之。曰張衡。將軍起列校。主將陷陣。單騎拔之。推主帥上馬。短兵接戰。身步行。乙將軍。真天人。初隸黃得功。

後隸史道鄰。面中飛矢。屹不動。揚州化作睢陽城。將軍戰死舊城下。誰能傳之昌黎文。

劉體仁七頌堂文集。明季。潁州李將軍。栩挺身入劇賊袁時中營。招之降。賊殺栩。忽聞有乙將軍者。追破其衆於細陽舊城。縛二賊將。酌酒於李將軍位前。跪而斬之。予於是識乙將軍。將軍名邦才。字奇山。山東人。初從禁旅爲隊長。大將黃得功與流賊戰於霍山。單騎陷水田中。賊圍之數重。射死所乘馬。得功射賊輒洞胸貫甲。相持會暮。餘二矢耳。而邦才從高望見之。識其冑。曰。黃將軍也。大呼馳之。賊散走。得功乃自拔上。邦才授馬。分箠中矢。步從得功走。時轉射其追騎。殺十餘人。始及其大軍。邦才自是名動軍中。邦才善治軍。器甲必精美。卒服敝惡者。輒罵之爲乞兒。務使與己等。實以耗其財。不使有贏。鹵獲皆歸有功。己無所問。自兵興。邦才常在軍所。號爲南五營者。往來豫楚。其餘名稱雜沓。不可勝紀。穎壽六。霍歲被兵。將軍解圍陷陣。邀擊追奔。大小十餘戰。功皆冠軍。或上其功。或移其功。他人者數矣。每飲至。同列憤。嗾使言。輒謝曰。此我衆不惜死。故破敵。我一人何能爲。終不自白。形貌僅中人。皙顏場準。援背而蜂髻。善投壺。居常激矢百變爲笑樂。愛敬士大夫。進退安雅。初不知其不知書也。其休兵濠上也。予道過之。方獵還。爲予置酒割鮮。自彈琵琶。侍姬歌秦聲。相和歡甚。覆琵琶於膝。注視予曰。邦才出行間。致偏將。數論功。拜尙方銀幣。賜以大帥薦者。膾且滿。邦才非其人也。所可報國家者。此身耳。願不見敵。但當調曼容。弦歌娛心意。一朝上馬去。且判此肝腦矣。予心異其言。後史公可法請願得邦才自隨。遂以總兵官駐揚州。未幾。竟戰死。

贈鹿野菴主人

達師靜者流。神氣周八表。寒林無冬春。澄湖照昏曉。倚杖立蒼苔。長空過飛鳥。

倪彤文齋頭喜逢殷嘉生卽事

九龍山隴別。相遇郭西偏。詩律看來細。狂名老去傳。雨晴江上路。櫻筍暮春天。共酌尊中酒。藜牀一醉眠。

秦淮曲

青溪祠畔彩雲停。舊院樓臺入杳冥。惟有巴童吹北曲。夜深獨自倚牀聽。

徐開任三首

開任字季重。崑山人。有愚谷詩稿。

明詩綜朱長孺云。季重詩原本少陵。深情至性。激發而出。使讀之者留連往復而不能自已。

詠史

吾愛張處虛。卓犖有深見。時危不應辟。誰知非獨善。帶索說張溫。掉舌如流電。宦豎得早除。甯召羌戎變。一人計不行。遂使羣雄戰。誤國有餘辜。殺身何足怨。陸賈善因時。神閒識亦慎。樂生似韜光。獻策非謀進。誅呂不居功。安劉無後釁。置身將相間。安危可靜鎮。天下有心人。社稷彈指定。堪笑樓君卿。侯鯖徒自潤。

送仲兄司理邵陵

麥秋四月南風起。送兄迢迢渡澧水。此地新經烽火來。萬井蕭條生荆杞。憶昔邵陵全盛時。桐封愛子萬年枝。宮中爭唱銅鞮曲。陌上時吟估客詞。一朝物換人亦改。珉王宮闕無復在。北渚新愁落照中。蒼梧舊恨秋雲外。執手相看杯酒前。離魂常傍洞庭船。驚猿帶雨嘯寒夜。征馬追風踏暮天。丈夫不瀟離別淚。天

涯知己若同氣。此行莫負桃源心。洞中雞犬與時異。

張彥之二首

彥之、一名慤，字洮侯，松江華亭人。

明詩綜朱朗詣云：洮侯爲人寬博無同異，其詩莽蒼不事繩尺，質本景純而臻於嗣宗。

今世說彥之卓犖知大節，深沈好書，詩歌與董黃齊名，尤喜自負，使酒善侵人，然實無他腸，人以是原之。

詩觀南京兵尙閱操衣百鶴繡袍，洮侯詩云：金甲銀鞍戰士豪，六軍承詔著功高，而今攻守江南靜，百鶴空思賜戰袍，百官燈白，祭酒燈紫，洮侯詩云：御柳低垂曉色開，天壇香繞淨蒼苔，陪京國學當年事，紫色燈稀祭酒來，二詩足備故實。

寄錢開少滇南

淵明感晉亡，幼安憫漢促，自古無全人，安能致明淑，一身情有餘，萬里行不足，衡山窮荆陰，零陵踐南服，巖壑鬱嶽崎，山川縈重複，詞賦非務閒，棲遲同豎牧，人事悲沈淪，天道哀倚伏，千秋竟何人，曷以守幽獨，送林武武宣遊豫州

九月微霜欲渡河，送君千里奈愁何，華林秋落遊人遠，少室風高木葉多，樽酒自憐江外別，菊花仍是客中過，懸知白雪梁園在，此日平臺好放歌。

吳懋謙十三首

懋謙，字六益，松江華亭人，別號華萃山人，有苧菴集。

汪琬說鈴。吳懋謙訪余邸舍。每被酒。自誦其所作遊五岳詩。音響琅琅。若出金石。覺爾時意致適上。不可復及。
三岡識略。華萃山人喜吟咏。遨遊摺紳間。詩名甚著。年屆古稀。纔喪妾。復買一姬。膏面染髭。以博如皋一笑。予戲貽一詩云。驢
人春晚愛幽居。老去風情尙未除。舊賦白頭憐薄倖。新題紅葉怕生疏。爐薰翠被迎歡夜。髻擁寒燈見面初。莫倚巫山行雨慣。
襄王今是病相如。

明詩綜。魏楚白云。六益五言。未盡本於建安。而筋力出諸作者之上。

田按。六益才情爛漫。讀其詩。有蕭瑟蘭成之感。

烏棲曲

沙棠爲楫。桂爲舟。采菱唱罷。吹笙篴。送歡板橋。望江路。風波無情。郎莫渡。

聞舟中吹笛

空江微微。月東出。何人舟中。吹鐵笛。傳呼隔水。不知名。寂寞滄江。迴夜色。吳音越調。聲悽愴。遠遊客子。思
故鄉。燕子梨花。春已暮。欲歸不歸。空斷腸。

長至旅懷寄龔芝麓先生

冉冉歲將晏。百卉腓以殘。葭灰動晨夕。蒼霧浩漫漫。白日凍高阜。玄陰翳層巒。流睇鮮故物。遊矚盛憂嘆。
小人備鄙志。烈士存苦顏。堂上展琴瑟。哀激已無端。

長安咏懷

驅馬過燕市。春陰黯不開。沙昏北平壘。日下黃金臺。地勢臨關闕。山形入殿來。傳聞昔年事。惆悵有餘哀。

仲冬同慈谿王白民儲潭送周計百司李之南昌

惜別此潭醉。相逢又幾時。一江木葉下。萬嶺夕陽遲。野店維官舫。村坐走廢祠。不堪重回首。霜露正淒其。

南康道中

連山睥睨齊。萬里過江西。索米勞妻子。擔簦聽鼓鼙。江黃龍母渡。風黑虎倭號。辛苦南康道。蕭蕭倚杖藜。

嶺南

辭家便典鷓鴣裘。司馬淒其已倦遊。路指番禺蠻雨夕。帆迴滇水瘴煙秋。降王舊築蓮花寨。洞女新開椰酒樓。此日孤身憑眺望。短歌清笛不勝愁。

崑山懷二陸

斷碣荒苔鬼夜號。蕭蕭木落下亭皋。三吳曉日聞秋雁。萬里長江送暮濤。祠廟衣冠衰草合。山城笳鼓朔風高。登臨莫問當年事。寂寞書臺空野蒿。

春日雜感

吳子栖遲大海濱。東風落日自逡巡。陶潛漉酒元無伴。王粲登樓或有人。老去江湖生白髮。愁來天地失青春。東南十載空遺恨。夜夜憑高望北辰。

吳閫夏感

霏霏夏雨滯吳城。深夜猶聞鼓角聲。薊北頻年還重斂。淮南今日又徵兵。千門涕泗瘡痍盡。萬國關山太白明。莫上靈巖更西望。溪雲江樹不勝情。

戊戌春日有感

三月春殘御柳斜。高城雪盡隱悲笳。黃旗南苑馳征騎。曉漏西清待翠華。寢殿棠梨飛野蝶。漢陵風雨泣棲鴉。可憐一片昆池水。依舊東風泛落花。

暮春咏懷

小築茅齋蘆荻邊。萬方風雨哭春天。東吳杼軸空三戶。南粵烽煙已二年。張儉無家貧尚在。虞卿多難病誰憐。依人終信謀生拙。短鬢江湖夕照前。

春閨

玉釵寂寞暗生塵。細草微香壓錦茵。燕子尙啣花片舞。憐君何事不知春。

徐崧五首

崧字松之。吳江人。

宿楓江法華禪院

萍蹤原不定。夙昔聽清緣。庵水知平日。楓江別幾年。客船驚犬吠。市鼓報魚鮮。夢醒寒衾短。披衣坐曉天。

寶林寺

金閭多擾擾。至此定心清。一寺石橋過。兩涯春水生。白雲天倒映。北斗夜空明。自有神魚化。應將法雨行。

仲春六日客寶林李灌溪侍御惠我酒資

憶昔頻招隱。漁樵得並遊。人間無白社。舍北有丹邱。鶴下迎仙館。花開禮佛樓。猶龍身正健。我道見風流。

同朱望子過福濟觀贈姚玉緯鍊師

友鶴餐霞玄思通。碧桃花隴有神宮。笙吹斗閣三天上。藥搗丹臺四月中。雲水誰如王省幹。塵埃難辨呂仙翁。看君好客嫺風雅。竹杖紗巾自不同。

過包朗威孝廉靈巖山居

卜得幽居傍硯山。晚年學佛世情刪。茗談不異精藍靜。梵課仍如老衲閒。松葉陰中雲冉冉。杏花風裏澗潺潺。自從絕上公車意。一過江城即便還。

李煒六首

煒字赤茂嘉善人有物外軒稿。

詩觀二集格齋詩高視闊步近太原公子氣概仙裳稱五古在阮陶之間洵不誣也。

我愛漢陰叟。棄機灌園蔬。我愛河上公。緯蕭鍛明珠。優悠可卒歲。取起不求餘。囿圍泰山雲。觸石合卷舒。猗猗蘭蕙花。因時成榮枯。養志百年內。身名同晏如。

日余不師訓。少小好奇計。結交湖海賓。抵掌天下事。愁如縻縲鷹。矯若悲踠驥。外強而中乾。道不足御氣。懷思古至人。神明獨無累。彈琴蓬戶中。緬然發高視。龍蛇守道真。毀譽棄若屣。甯能人世間。懷憂獨長喟。北渚河渺渺。秋風生洞庭。夫君來夷猶。芙蓉愁殺人。寄顏雲霄間。揮袂當層城。曠矣恩不接。懷哉時載陰。臨川望河鮪。緬邈若飛沈。登高遡歸雁。反對豺狼吟。同衾戀膠漆。遠道怨商參。側身隴坂長。離懷誰能任。烈如齊聶政。怒若燕荆卿。我無雲雨資。小勇安足矜。老子執謙退。清淨垂鴻名。莊周處不材。後世稱達生。灰心滅恩怨。劍術同飛塵。

有所思

賤妾依吳地。夫君滯楚湘。荆蠻雲樹遠。彭蠡雁鴻長。別怨生瑤瑟。相思滿玉床。當年阿母畔。空學繡鴛鴦。

贈墨菴

問君何感慨。削迹竟曇摩。舊事觀空盡。餘情埋照多。長卿工慢世。楊惲善悲歌。突兀疏狂意。空憐日月過。

錢光繡二首

光繡字聖月。鄞人有歸來閣集。

巖臺寺

抱膝巖前坐。巉岼勢欲崩。泉飛天半雪。門掩隔溪藤。鶴洞迷丹竈。仙墳罷漆燈。寄聲劉子驥。孤棹興堪乘。

田家

一株紅樹恰當門。古澗橋欹斷水痕。日暮牛羊收拾早。昨宵虎迹大於盆。

錢謙貞五首

謙貞字履之常熟人。

列朝詩集履之生而韶令。有雋才。起於孤童。能自鏤礪。讀書求志。闢懷古堂以奉母。簾戶靚深。書籤錯列。所與游惟魏冲叔子。馮舒已蒼。相與論詩度曲。移日永夕。下鍵謝客。意泊如也。中歲攻詩。不屑應酬俗調。友人程孟陽精於論詩。少所許可。猶稱履之之詩。以為鮮妍和雅。妙得近體之法。

懷舊集履之清姿玉立。好讀書。工書法。詩歌南曲。皆不學而能。與人交似落落。久而不衰。彌見其篤。

田按履之牧齋從弟。其歲暮雜詩云。句偶類浣花。體或擬長慶。自然近中晚。非敢薄初盛。可謂善於自道矣。

雪晴小飲北山茅三間卽事

雪壓雲菴晝獨眠。偶憑雙屐試晴天。窮檐晚日懸冰柱。野服春寒著水田。臧是穀非從過耳。濁賢清聖且隨緣。報慈橋畔何人墓。宿草淒淒起夕煙。過亡友陸九來墓

懷古堂夏日漫興

三間五架草堂新。數卷圖書一病身。靜似放參居士室。閒如墜戶輟耕民。浣花杜叟曾題字。垂柳陶家舊卜鄰。不爲薄今偏愛古。南村已少素人心。

舟過梅李弔族祖心閑翁墓

輕舟漫趁落潮東。爲弔孤墳半畝中。荒草斷邊人種麥。浮圖高處鳥呼風。生多寄迹眠僧院。死合招魂傍梵宮。一束生芻一杯酒。幾人曾酌若敖翁。

莊樂與余數年同病久失過從風雨中忽挈舟見訪因宿兒子書樓夜話追昔撫今悵然有作

杖策招尋久未能。扁舟忽有興堪乘。參商一別看兒女。風雨來過見友朋。算老漸如將去客。論心同是在家僧。南菴若遂比鄰約。瓢衲連床夜夜燈。

歲暮書齋卽事次夕公韻

聲栗風高北榭關。卷中丘壑畫中山。衰顏向日薰如醉。弱足浚寒凍欲頑。翻覆炎涼隨歲改。凋零花木逐年刪。黃麻紫誥非吾志。十賚新同處士頒。

東蔭商二首

蔭商字雲雛。華陰人。□□舉人。

新嫁娘

十五爲新婦。梳頭學冶粧。畫眉猶未慣。不敢輒呼郎。

閒居述懷

狂夫家在麗農山。俯視三峯似小鬟。只爲高吟驚帝座。孤蹤遠謫在人間。

姜廷梧二首

廷梧字桐音。紹興山陰人。有芳樹齋詩草。

今世說桐音行文不起草。口所誦卽成句。論者謂其詩類何景明。

渡江

句踐吞吳日。斯江卽戰場。泛舟秋水闊。繞岸海雲長。浪靜鯨鯢沒。天高鶴鶴翔。至今沙草渡。有客弔夷光。

少年行

金鞍蹀躞紫駟驕。火浣裁衣窄過腰。白日城頭秋草盡。彎弓原上射飛鵬。

陸繁昭二首

繁昭字儂胡。一字拒石。錢塘人。

今世說陸麗京云。西陵儂語。家有靈蛇。若儂胡秀如春采。仲昭絢若朝霞。故當並推。

過包氏山莊聞簫

樹杪縣飛閣。雲深結小亭。秋花入夜白。曉月到山青。人影飄羅帶。簫聲隔畫屏。不知樓上女。度曲與誰聽。

南屏

上人蒙難後。而我亦餘生。不爲浮名誤。焉知出世情。晴嵐開曉色。寒鳥變春聲。若許陶潛醉。相隨入化城。

王啓茂四首

啓茂字天庚。石首人。貢生。有渚宮集。

湖北詩徵傳略。天根崇禎末以明經薦不就。兄啓京啓遵弟啓崇啓芬皆有才名。人稱五鳳。天庚性獨淡素。工詩詞。避兵湖南

山中年七十卒。

陳伯璣詩慰續集。石首王天庚。門有車馬客。見余多怒嘆。非爲禮數簡。亦知肝膽真。祇慙餽贈少。未能療客貧。余貧客所見。徒免甌中塵。結交二十載。與鸞奉嘉賓。西隣豈不富。叩戶何曾應。願客早富貴。爲余作主人。輕財若埃沫。致賄如邱陵。門下三千客。各賜千黃金。人人無惡聲。薄俗庶乃敦。詩有古意。然未免如翟公署門。識者或議其淺也。世間殘客亦正不可少。

送道人入山採藥

去去雲山遠。餐霞不裹糧。荷鋤千嶂曉。洗藥一溪香。夜月閒丹竈。春風暖藥房。何時還市肆。吾已識韓康。

過袁中郎捲雪樓感舊

庾信羅含宅尙垂。小樓回首更淒其。澄江曾入驚人句。華屋堪增過客悲。千載後知聞笛處。十年前記倚

闌時文章不盡風流盡。盼盼於今屬阿誰。

同王子荆民部曹樞之叔方謁張文忠純忠堂同賦

袍笏巍然故宅殘。入門人自肅衣冠。半生憂國眉猶瑣。一詔旌忠骨已寒。恩怨盡時方論定。邊疆危日見才難。眼前國事君知否。拜起還疑拭目看。

考田詩話。張江陵救時之相。功過原不相掩。恩怨盡時方論定。邊疆危日見才難。二語。竹垞稱爲詩史。不知乃王啓茂謁文忠公祠句也。

舟中卽事

武陵溪水碧如天。幽興狂來自扣舷。海岳囊裝無俗物。元真奴婢有仙緣。深防好事傳爲畫。定被凡人喚作顛。把臂便應從此遠。只今南北甚烽煙。

鄭階四首

階字晉之。吳人。有慎獨居詩存。

湖山靈秀集。晉之嗜酒耽吟。齋中常設一木主。題杜拾遺名。或得醇醪佳茗。必先以奠焉。其癖於詩可知。

毛公壇

包山路茫昧。委蛇履艱澀。塢窮絕人語。計里將二十。雞犬隱桃花。松蘿遶原隰。巖雲白襪襪。谷風清習習。

振衣躡危磴。見石先拜揖。仙遊二千載。寂寞壇猶立。苔蘚漢時青。碑題唐世緝。傳聞紺毛叟。養真羅浮岌。木食龍虎馴。道尊山鬼泣。宇宙元一粟。往來待呼吸。夜靜湖月高。鶴馭常來集。攀竹仰清風。曠哉天如笠。醉步南村過。允謙復酌。

南垞多逸地。獨往聽秋聲。行野杖橫把。出村船倒撐。碧雲寒弄影。紅樹晚含情。恰有幽人過。重沾爲解醒。
韜光庵

下方擾攘上方幽。磴道縈紆古木稠。剝竹引泉分入寺。鑿雲開徑就登樓。青蔬白飯僧緣好。蒼鬢紅塵客夢休。徙倚北高峯畔立。浙江如鍊抱湖流。

湖上

點點春山小。片片春帆渡。帆去忽天涯。青山自朝暮。

陸嘉淑二首

嘉淑字冰修。海甯人。有辛齋遺稿。

靜志居詩話。冰修崇情遠迹。高酣長謠。晚雖臧身人海。而青蓮在泥。心終不染。

阮元兩浙輶軒錄。查編修慎行。冰修壻也。少從學詩。得其指授。

采桑曲

江南三月青陽天。桃花匝而楊花顛。流鶯自語玄鳥斜。陌上誰家雙鬢鴉。繡箔柔筐臨碧甃。百帖春蠶眠不起。素腕迢迢倚夕陽。清曠的的回秋水。別有梅花洞房妾。永日盈盈淚凝睫。織成錦字寄別離。結成同心鎖。箚篋偶向城隅恨。自滋長憐春暮心。尤怯使君五馬莫踟蹰。兒家夫婿關西俠。

蕪城感舊

花影鶯聲句。隅傳無端真得玉人憐。劉郎前度身猶在。杜牧三生事惘然。銀燭夜闌分險韻。畫欄春半響么絃。玉鉤斜外傷魂處。落盡桃花叫杜鵑。

陳祚明三首

祚明字胤倩。仁和人。有稽留山人集。

北征

百年多攘攘。跋涉意何如。京口歸潮大。丹陽落日孤。轉漕千舸擁。過閘萬人呼。泛水扁舟影。蕭條短髮疏。

香山

夾道青峯似畫中。先朝列帝敞行宮。鶯花仍度三春日。松柏長吟萬壑風。錦石親承鑾輅轉。玄猿猶說翠華東。小軒御榜留宸翰。行客徒悲古木空。

燕市

長安古狹邪。道隘不容車。溝水春泥擁。愁君白鼻騮。

黎祖功二首

祖功字荅爾。新建人。有不已集。

西江詩話。耆爾早慧。能爲有韻之言。割愁於海上羣峯。破涕於一江春水。意有所觸。語輒隨之。顧奇詭不凡。頗類李長吉。使壯且壽。稍加以理。真可奴僕命騷。年未二十。慘死於盜。惜哉。所著詩自序云。戊子歲。始學嘲咏。紀義熙之五年。存長城於數字。其大指如此。陳士業評其詩。如張遼被甲持戟。大呼衝孫權之壘。當者人馬辟易。如李愬率山南銳士。冒風雪。絕洄曲道。夜半入懸瓠城。如禰衡著牟矜單絞。過漁陽而前。躡駃脚足。容態不常。

吁嗟行

山何不攢峯爲刃。以絕我脰。天何不降玉爲棺。以封我尸。區區姓氏人不知。面目塵土何所爲。魯連好個儻。曹公無威儀。肯如小儒舉舉衣裳學仲尼。齧我筆。燔我詩。手中提攜三尺兒。誰博白兔兩丸泥。荒雞驚起夜亂嘯。神鬼駭駭得志天地悲。

田按。少年才人。負奇天折。有雲間夏完淳存古。故吏部瑗公允彝之子。十七歲著大哀賦。不減庾子山。世多傳之。豫章黎耆爾。前浙江提學博菴元寬之子。詩甚奇崛。不可一世。亦十七歲江行死於盜。先是賦吁嗟行一篇。不數日遂死。若讖然。

讀賢書

白日閒羈旅。青雲點友朋。千金新得驥。六翮老如鷹。天地雪霜笠。江湖風雨燈。蕭條君不問。潦倒我猶能。

國家圖書館



004759985



. 86

9

籍